



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Ein Tröstbüchlin für die sterbenden**

**Odenbach, Johann**


**Wittemberg, [ca. 1540]**

**VD16 O 249**

**urn:nbn:de:hbz:466:1-34573**









Jh. 5956.























# Ein Tröst- büchlin für die sterbenden.


An die Hochgeborne  
Fürstin / Frau Elisabeth / Pfaltz-  
grefsin bey Rhein / Herzogin in  
Sachsen / Grefsin zu Vel-  
denz / Landgrentin  
zu Hessen.

Wittenberg.



48





Faint, mirrored text from the reverse side of the page, appearing as bleed-through. The text is illegible due to its low contrast and ghosting.



# Der hochgebornen

Fürstin vnd frawen / frawen  
Elizabeth / Dertzogin inn Bei-  
ern / Pfaltzgreuin etc. Greuin zu  
Veldentz / vnd geborne Land-  
greuin zu Dessen / seiner gne-  
digen frawen / entbent  
Johan. Ddenbach /  
Gottes gnad vnd  
frid inn Chri-  
sto Ihesu.



## Durchleuch-

tige / Hochgeborne  
Fürstin / gnedige  
fraw / Was vns fur <sup>Rom. 15.</sup>  
geschrieben ist / das  
ist vns zur lere ge-

schrieben / auff das wir durch gedult  
vnd trost der schrift / hoffnung haben /  
Mit trost aber vnd hoffnung / weis ich  
niemands so hoch dienstlich zu sein / als  
den armen sundern / vnd sonderlich den

A ij leidenden



leidenden vnd sterbenden / Denn sie  
werden mit vngedult vnd verzweines-  
lung (durch des Teuffels eingeben) gar  
hart versucht / Darumb sol man sie  
vleißiglich heimsuchen vnd trösten /  
Mat. 25. nach der lere Christi / der da sagt / Ich  
bin krank gewesen / vnd ihr habt mich  
besucht etc. / Vnd wie wir vns mit den  
Rom. 12. frölichen freuen / also sollen wir mit den  
weinenden / vnd schwachen weinen /  
Gala. 6. vnd ihe einer des andern last tragen  
helffen / Denn David sagt ihm Psalm /  
psal. 41. Wol dem der sich annimpt des dürfft-  
tigen / Den wird der **H E R R** er-  
retten zur bösen zeit / Der **H E R R**  
wird ihn bewaren vnd bey dem leben  
erhalten / vnd ihm lassen wolgehen auff  
erden / vnd nicht geben inn seiner feinde  
willen / Der **H E R R** wird ihn ers-  
quicken auff dem bett seines wehtags /  
sein gantz lager wandelstu inn seiner  
Eccle. 7. krankheit etc. Auch sagt Salomon /  
Es ist besser ins klaghaus gehen / denn  
ins trinckhaus etc.

So



So wir nu dem nach alle/die Kran-  
cken brüderlich zu besuchen / vnd mit  
dem worte Gottes zu trösten / schuldig  
sind / Hab ich dis tröstbüchlin / den ster-  
benden menschen on einigs vmbschwei-  
ffen / auff's aller kürzest vnd tröstlichste  
für zu sagen / aus heiliger Göttlicher  
schrifft zugericht / vnd solch **E. S. G.**  
Dieweil sie zu der Ehre Gottes hoch-  
gevlissen / vnd sich im Enangelio Chris-  
ti stets vbet / zugeschrieben / der hoff-  
nung / Es werde vilen Christen ange-  
nem vnd tröstlich sein / vnterteniglich  
bitten / **E. S. G.** wollen / wes ich hierin  
mit gnaden Gottes / lieben vnd dienst  
vermöcht / für gut auffnemen / vnd  
gnediglich erkennen / Denn **E. S. G.**  
gehorsamlich zu dienen / bin  
ich allezeit willig / die  
lasse ihm der aller  
höchste befoh-  
len sein.

**A iij**

**Zum**



## Zum leser.

Erstlich findestu sprüche vnd bericht/den krancken des tods begirig zu machen / Darnach tröstung die fülle aus dem Neuen testament/ den krancken auff den glauben vnd vertrauen im Christum zu weisen / Am letzten/ gemeine beichte vnd gebete / den sterbenden auff's aller tröstlichst fur zusagen/ Aus welchem allem du nemen solt / so viel dich düncket dem krancken not vnd nütz sein.

## Sprüche vnd bericht/ den krancken des tods begirig zu machen.

1. pa. 30. **W**ir sind frembding vnd gese/wie vnser  
re veter alle/ vnser leben auff erden ist  
wie ein schatten / vnd ist kein auff halten.  
Iob. 7. Des menschen tage sind taglönners tag /  
Ja wind vnd nichts.

Wic



Wir sind gemacht wie Kot/vnd müssen Job. 13.  
zu staub werden/wie ein blat/ das der wind  
hinfurt/ däre stupffel / vnd ein Kleid das die  
schaben essen.

Der mensch wird mit viel elend beladen/  
gehet auff wie ein blume/ vnd wird zutretten/ 146  
vergehet wie ein schatten /kurz sind sei-  
ne tag / vnd der HERR hat ihm ein ziel  
gesetzt/das wird er nicht vbergehen .

Wo ist jemand der da lebt / vnd nicht Psal. 59.  
sihet den tod?

Unser zeit fert schnell dahin / vnd wir 90  
fliegen dauon.

Ein mensch ist inn seiner zeit wie hew/ 103.  
er blüet wie eine blume auff dem felde/wenn  
der wind darüber gehet / so ist sie nimmer  
da .

Der mensch ist der eitelkeit gleich/sein 144  
zeit gehet dahin wie ein schatten.

Ein iglichs ding hat sein zeit/ vnd alles Eccle. 3/  
furnehmen vnter dem himel hat seine stunde/  
geboren werden hat seine zeit / sterben hat  
seine zeit .

Der tod seumet sich nicht. Eccle. 12

Durch ein menschen ist der tod vber alle Rom. 5.  
menschen gangen / vnd durch eins einigen  
sunders einig sund/müssen wir alle sterben .

Alles fleisch ist wie ein gras /vnd alle i. pet. 1.  
herligkeit des menschen /wie ein blume des  
gras.

2 iii Unser



Jaco. 4.

Unser leben ist ein dampff/ der ein kleine zeit weret/ darnach aber verschwindet er.

Heb. 13.

Wir haben hie kein bleibende stat/ sondern ein zukunfftige suchen wir.

**A**lles was sind der welt her geboren worden ist / hat müssen den tod leiden/ vnd was noch lebt vnd wird/ mus alles sterben.

Wer das leben entpfehet / mus auch den tod leiden/ da hilfft nichts fur.

Mit dem geding bistu inn die welt kommen/ das du widderumb heraus must.

Des tods bistu warten gewesen/ so bald du inn mutter leib entpfangen wardest.

Was du vber den ersten tag deiner geburt gelebt hast / ist alles ein vberflus vnd zuviel/ vnd Gott hat dich lang gnug leben lassen.

Der sachen ist kein rat/ du must sterben/ vnd niemands kan dich schutzen vnd auffhalten/ Denn du bist staub/ vnd must widderumb zu staub werden.

Nicht anders nim dirs inn deinen syn/ denn das dein ziel zuleben herumb vnd aus sey.

Dieser vnfall trifft dich nicht allein/ Den gros / Klein / reich / arm / jung / alt/ herrn/ Knecht/ man/ frau/ vnd alle menschen müssen diese fare bestehen.

Diese schuld bistu lang schuldig gewesen/ vnd must sie bezalen/ ihe ehe ihe besser.

Wenn



Wenn du mit hundert andern geköpffte  
odder getödet müst werden / was herrestu  
für ein forteil / du werest der erst odder der  
letz? Welchem am ersten geholffen wird / der  
kompr der marter bald ab.

Du herrest wol vmb Gott verdienet /  
das du eins bößern vnd gehen tods werest  
gestorben / darumb hastu im zu dancken / das  
er dich also gnediglich angreiffet.

Ds leben ist kurtz / Kindheit verflusst  
wie wasser / Jugent vnd manheit sind vol  
sund vnd arbeit / das Alter vol franckheit /  
wiewol es vnter tausent nicht einer erlangt.

Ds leben ist nichts anders denn ein ge  
fendnis / beschwernis / elend / dienstbarkeit /  
ferligkeit / müde / arbeit / vnlust / sund / franck  
heit / anfechten / vnd eitel creuz. Dem allem  
der tod ein feierabend züricht.

Der tag des tods ist besser / denn der tag Eccle. 7.  
der geburt.

Im geburts tag bistu inn keltz / hitze /  
hunger / durst / verdris / sund vnd elend ge  
sagt / Im tag deines tods wirstu von allem  
leiblichen vbel erlöst. Derhalben verflucht  
Iob vnd Jeremias / nicht allein den tag der Iob. 3.  
geburt / sondern auch den / der dem vater die Jere. 20.  
botschafft bracht / wie ein kind geboren were.

Die bitterkeit des tods / so dir gegeben  
wird / vbertriffet allen schmerzen / so du dein  
lebenlang ihe erfahren hast / weret aber nicht  
lang / vnd ist bald geschehen.

2 v Mit



Mit Gottes gnaden vnd hilff/ kanstu hindurch wischen/ vnd diesen kelch trincken.

Du bist des leidens Christi inn dein leben nie recht gewar wurden/ jzt soltu es inn tod williglich erfahren.

To. 12.

Wo sich der Satanas mit gewalt/ als zur legt an dir versuchen wolt/ So wis das er ein anmechtiger feind / vnd von Christo vberwunden ist/ vnd an dir nicht mehr schaffen kan/ denn souiel du dich fur im fürchtest/ vnd an Christo zweuelst.

Kömpf dir ein erschrecklich anfechtung fur/ So dancke Gott/ das er dich so gnediglich angreiffet / Denn du werest wol schwerer straff würdig.

Mat. 4.

Der böse geist so Christum versucht/ wird dich vnversucht nicht lassen/ er kan aber nicht mehr schaffen / denn er hat nichts an

Johs. 14 Christo / noch an dir.

**E**S werden dir viel anfechtungen furkomen/ die soltu gedultiglich leiden/ vnd gedencen das dir der Herr noch viel grösser anfechtung billich möcht zuschicken / welches er doch aus gnaden nicht thut.

Wenn dein conscientz dir deine mangelfeltige sund auffmuzzet/ vnd dich zu gutten wercken weiset / So gedenc das Christus deine sund am creutz bezalt hat.

Lasse dich nicht die vnnützen gedanken bekümmern / das/ so dir Gott dein leben erstreckte/ du vermeintest frömer vnd geschickter zu

ter zu



ter zu sterben / denn ob du gleich (das vnmöglich ist) noch hundert jar lebest möchtestu durch dein fromkeit vnd verdienst / nichts gegen Gott verdienen .

Befindestu / das alle creaturn / die wider sind / vnd Gott selbst dir sein grimmigen zorn vnd greulich gericht furhelt / vnd thut gleich als ob er dein feind were / vnd sihest nichts denn eitel Teuffel vmb dich / So acht nicht was du fülest / thu augen vnd sinne zu / hafte auff dem glauben vnd Euangelio / kein Teuffel ist so starck / der es vmbstosse / psal. 55.  
hoff auff Gott vnd fürcht dich nicht / wirff dein anligen auff den **JEKKN** / der wird dich versorgen .

**B**isher bistu als tod gewesen / nu wirstu best anfangen zu leben / Denn der tod ist ein thür des lebens / ein anfang der auferstehung / vnd ein erledigung der sund vnd des eruges.

Gib der welt vrlaub / vnd nim den tod / so dir aus Gottes gnaden zugeschickt / mit 1. Cor. 3  
freuden auff / denn der ist dein / vnd mus dir Rom. 8.  
auch zum besten dienen .

Dieser schmerz vnd dis leiden / wird dir von Gott zu geschickt / vnd er züchtiget vnd strafft dich nicht / drumb das er dich hasse / sondern das er dich als seinen sone bewere vnd auffneme . Darumb las nicht ab / dieweil du vom **JEKKN** gestrafft wirst. pro. 5.

Alle



**Heb. 12 ?** Alle züchtigung vnd straff wenn sie da  
ist/wird nicht angesehen fur ein frölich/son-  
dern fur ein traurig ding /aber hernach wird  
sie geben ein fridsame frucht der gerechtig-  
keit/denen die dadurch geübet sein .

**Rom. 8.** Dieser zeit leiden ist nicht werd der her-  
ligkeit/die an vns sol offenbart werden.

**Rom. 8.** Trübsal /angst/ verfolgung / hunger /  
blöße/geferligkeit / schwerd /rod/leben /En-  
gel /Fürstenthumb / gewalt / gegen wertigs/  
zukünfftigs /hochs /tieffs / noch kein creatur/  
mögen vns scheiden von der liebe Gottes .

**W**enn du die vntrewe / falscheit /Gotts/  
lesterung vnd das Endchristisch wesen  
vnd leben dieser welt recht bedechtest/so solt  
dich nicht mehr gelüsten zu leben .

Tausent leibe ( wo es möglichen we-  
re ) soltestu verlieren / allein darumb/  
das du das Euangelion gehört vnd  
**Ephe. 1.** erfahren hast / Das du die erlösung vnd  
vergebung deiner sünde durch das  
blut Christi/ vnd nicht durch dein ver-  
dienst erlangen kanst.

**Mat. 6.** Du hast teglich gebeten / das dich Gott  
aus dieser bösen welt inn sein reich neme/  
vnd das sein wil geschehe/ So er dich nu zu  
seinen gnaden inn sein reich führen wil /soltu  
als sein kind williglich / gehorsam vnd von  
herzen



hertzen frölich sein/das du aus des Teuffels  
reich / aus diesem jammertal vnd ellenden  
leben / zu deinem Vater vnd allen auserwel-  
ten / ins ewig Paradis kömest.

Die Heiden / so doch on hoffnung wa-  
ren/haben sich aus liebe des künfftigen le-  
bens/selbst vmbbracht / Vnd soltestu /der du  
ein Christ bist ( vnd dem souel / trost / hoff-  
nung vnd ewigs leben eigentlich verheissen  
ist ) im tod verzagen / vnd nicht hertzlich be-  
gern zusterben ?

Die Jüden sterben mit freuden/die doch  
Christum gecreuziget haben / vnd ewiglich  
verdampft sind / vnd woltestu ein Christ nicht  
dapfferer sein inn tods nöten ? So dir doch  
solche freude zugesagt/die nie kein auge ge-  
sehen/nie kein ore gehört vnd inn keins mens-  
schen hertz gestigen ist / Vnd woltestu nu den  
vnfeligen / verfluchten Heiden vnd Jüden/  
mit menschlichem sterben weichen ?

1. Cor. 2.

Es ist der knecht nicht vber den Herrn /  
noch der schüler vber den meister / Christus  
dein meister vnd Herr / hat gelitten / vnd ist  
für dich gestorben / Du must auch leiden vnd  
sterben.

Mat. 10.

Alle die getaufft sind / die sind inn den  
tod getaufft / Du bist getaufft / darumb bistu  
auch inn den tod getaufft.

Rom. 6.

Vmb Gottes willen wirstu getödt / Du  
bist gerechnet für ein schlacht schaff / was sol  
ein schaff vngeschlachtet ? was sol ein Christ  
on

Rom. 8.

psal. 43.

on



on anfechtung / leiden vnd sterben.  
1. Thes. 3. Werde nicht weich inn dieser trübsalen  
(welche du weißt) das du begeben bist.

Grund wil Christus dein Zeiland vnd  
erlöser / warten vnd zusehen / ob du auch bey  
ihm stehen / vnd des tods vmb seiner willen  
ritterlich erwarten / vnd seinem leiden gleich-  
förmig werdē wöllest / Darumb leide dich als  
1. Thes. 2. ein gutter streitter Ihesu Christi / vnd nicht  
gedenck gekrönet zuwerden / du kempffest  
denn ritteilich / Denn so du mit stirbest / so  
wirstu auch mit leben / leidestu / so wirstu mit  
herrschen.

Treulos ist der fur der welt gehalten /  
welcher sein zorn inn herligkeit verlest / vnd  
soltestu nicht eherlos sein / wo du inn tods  
nöten von Christo dein Zeiland abweichest.

Nim dein creutz vnd tod auff dich / vnd  
Mat. 16. folge ihme nach.

Weistu nicht / mit was grossen freu-  
den vnd begiriden / alle Aposteln vnd diener  
Christi / ihr blut / vmb Christus willen /  
vergossen haben vnd dem tod entgegen ge-  
gangen sind?

Vmb Christus willen hastu noch nicht  
besunders gelitten / Darumb ergibe dich frö-  
lich inn den tod / wie ein schefflin vmb Chris-  
tus willen.

Wirff dein anligen auff den 3. 2. R.  
Psal. 55. 2. 2. / der wird dich versorgen.

Gott ist bey dir inn der not / er wil dich  
heraus



heraus reissen vnd zu ehren machen / Vnd er Psal. 91  
steher dir zur rechten / das er dir helffe. Psal. 109

Hoff du nur auff Gott / so ist dir ge- Psal. 28.  
holffen.

Sey getrost / vnd woge den stinckenden  
madensack / an deinen erlöser vnd seligmacher  
Christum / vnd halt dich allein zu ihm vnd  
an sein heiligs Euangelion / Welchs ist ein Rom. 12  
Krafft Gottes / die da selig macht alle / die das  
ran glauben.

Harre des **H E R R N** / vnd las dein Psal. 27.  
hertz fest halten.

Benele dem **H E R R N** deine sach / vnd Psal. 37.  
hoff auff ihn / er sols wol machen.

hab acht vnd wache / Denn dein wid- 1. Pet. 3.  
dersacher der Teuffel / wird sich zu dir fügen /  
wie ein brüllender Lew / vnd suchen wie er  
dich verschlinde / dem widderstehe fest im  
glauben.

Du hast nicht zu Kempffen mit fleisch  
vnd blut / sondern mit den Fürsten vnd ges  
waltigen / mit den welt regenten der finstern  
is / mit den geistern der böshheit / Ja mit  
sund / tod / helle / vnd Teuffel / Deshalb halt  
dich als ein Christlicher ritter / vnd ergreiffe  
den harnisch Gottes / das du kündest widder  
stehen / vnd inn allen dingen gerüst sein / So  
stehe nu vmbgürtet mit der warheit / angeso  
gen / mit dem krebs der gerechtigkeit / Inn  
allen dingen ergreiffe den schilt des glau  
bens



bens / mit welchem du könnenst ausleschen /  
alle feurige pfeil des böswichts / vnd nim an  
dich den helm des heils / vnd das schwert des  
geists / welchs ist das wort Gottes / vnd bitte  
Gott sters inn allem anligen.

**U**nd so ich nu hoff / du seist willig / mit  
Christo zu leiden vnd zu sterben / wil ich  
dir sagen / wes du dich entlich vnd genzlich  
vertrösten solt / vnd das alles aus dem heiligs  
gen Euangelio / damit du dich des lebens  
mehr denn des tods vertrötest / vnd  
nur Christum dir fursetzest / mit  
ein vesten glauben /  
Höre du mit  
ernst zu.

## Tröstung für den kran- cken / aus dem New- en Testament.

- Mat. 1.** Es wird sein volck selig machen von ihren  
sünden.
9. Die starcken dürffen nicht des artzes/  
sondern die krancken / Ich bin komen die sun-  
der zur bus zuberuffen / vnd nicht die from-  
men.
15. Ich bin gesand zu den verlornen schaf-  
fen.

Des



Des menschen Sone ist nicht komen/  
das er ihm diene lasse/ sondern das er diene/  
vnd gebe sein leben zu einer erlösung für  
viel.

Wilcher glaubt vnd getaufft wird/der **Mar. 16.**  
wird selig/ wer aber nicht glaubt/der wird  
verdampft.

Also ist geschriben/ vnd also must **Luce. 24**  
Christus leiden/ vnd auferstehen von den  
todten am dritten tage/ vnd predigen lassen  
inn seinem namen bus vnd vergebung der  
sunde.

Sehet/das ist das lamb Gottes/welchs **Johann**  
der welt sünde hin nimpt.

Also hat Gott die welt geliebet/das er  
seinen einigen Son gabe/auff das alle/die in  
ihnen glauben/nicht verloren werden/son-  
dern das ewig leben haben.

Wer inn den Son glaubt/der hat das  
ewig leben/wer inn den Son nicht glaubt/  
der wird das leben nicht sehen.

Wer mein wort höret/vnd glaubt dem  
der mich gesand hat/der hat das ewig leben  
vnd kömpt nicht inn das gericht/sondern er  
ist vom tod zum leben hindurch gedrungen.

Ich bin die auferstehung vnd das le-  
ben/wer inn mich glaubt/der wird leben/ob  
er schon stürbe/vnd wer da lebt vnd glaubt  
inn mich/der wird nicht sterben ewiglich.

Ich bin der weg/die warheit/vnd das  
leben. **14**

25

Das



Das ist das ewig leben / das sie dich /  
17 das du allein warer Gott bist / vnd den du  
gesand hast Ihesum Christum / erkennen.

20 Selig sein die nicht sehen vnd doch glauben.

Acto. 4 Das ist der verworffen stein / der zum  
eckstein worden ist / vnd ist inn keinem andern  
heil / Ist auch kein ander name den menschen  
geben / darinne wir sollen selig werden.

Von diesem zeugen alle Propheten / das  
durch sein namen / alle die inn ihn glauben /  
vergebung der sunden empfangen sollen.

15 Wir glauben durch die gnad vnsern Herren  
Ihesu Christi selig zu werden.

Roma. 1 Das Euangelion ist ein krafft Gottes /  
die da selig macht alle die dran glauben.

3 Sie sind alle sunder / vnd werden on verdienst  
from gemacht aus gnaden / durch die  
erlösung / so durch Christum geschehen ist /  
welchen Gott hat fürgestellt / zu einem gnaden  
dienstuel / durch den glauben inn sein blut.

Abraham hat Got geglaubt / vñ das ist  
ihm zur gerechtigkeit gerechnet / den er zweifelt  
nicht an der verheissung Gottes / sondern  
war starck im glauben / Das ist aber nicht allein  
vmb seiner willen geschrieben / sondern  
auch vmb vnsern willen / die wir glauben / das  
Christus ist von toden aufferweckt / vnd  
vmb vnser sunde willen dahin gegeben.

5 Durch vnsern Herrn Ihesum Christum  
haben



haben wir freid/vnd ein zugang/im glauben  
zu der gnad.

Durch Christum werden wir behalten  
vor dem zorn/nach dem wir durch sein blut  
from vnd gerecht gemacht sind.

Der geist Gottes versichert vns /das wir  
Kinder Gottes sind / sind wir den Kinder/so  
sind wir auch erben Christi / so wir anders  
mit leiden /auff das wir auch mit zur herlig-  
keit erhaben werden.

Ist Gott fur vns/wer mag widder vns  
sein?welcher auch seinem einigen Son nicht  
hat verschonet/sondern hat ihn fur VNS  
alle dahin gegeben. Wie solt er vns mit ihm  
nicht alles schencken?Wer wil die aufferwele-  
ten Gottes beschuldigen? Gott ist hie/der da  
recht fertiget. Wer wil verdammen? Chris-  
tus ist hie/der gestorben ist/Ja viel mehr/  
der aufferweckt ist / welcher ist zur rechten  
Gotes/vnd vertritt vns.

So du gleubst inn deinem hertzen/das 10  
Gott Christum von todten hat aufferweckt/  
so wirstu selig.

Wer ihm vertrauet/der wird nicht zu  
schanden werden.

Der Herr ist reich vber alle die ihn an-  
ruffen/Denn wer den namen des **HERREN**  
wird anruffen/der sol selig werden.

**B ij** Unser



Vnser keiner lebt ihm selber/vnd keiner  
stirbt ihm selber/ leben wir/so leben wir dem  
14 Herrn/sterben wir/so sterbe wir dem Herrn/  
Denn dazu ist Christus gestorben vnd auff  
erstanden/vnd widder lebendig worden/das  
er vber die todten vnd lebendigen Herr sey.

1. Cor. 1 Christus ist vns gemacht von Gott zur  
weisheit/ zur gerechtigkeit/ zur heiligung/  
vnd zur erlösung.

15 Durchs Euangelion werden wir selig.

Christus ist gestorben fur vnser sunden/  
begraben vnd auferstanden am dritten tag.  
Wie wir inn Adam alle sterben/also wer  
den wir inn Christo alle lebendig gemacht.

Tod/wo ist dein stachel?  
Zell/wo ist dein sieg?

1 Cor. 1 Gott hat vns den sieg gegeben/durch  
vnsern HERRN Ihesum Christum.

Wie wir des leidens teilhaffrig sein/also  
werden wir auch des trosts teilhaffrig.

Alle Gottes verheissung sein Ja vnd  
5 Amen/inn Christo.

Gott hat die welt versanet inn Christo/  
mit ihm selber/vnd rechnet ihn ihre sunden  
nicht zu.

Gala. 1 Christus hat sich fur vnser sunden gege  
ben/das er vns errette/von dieser gegenwert  
tigen argen welt.

De



Der mensch wird durch die wercke des z  
gesetzes nicht from/sondern durch den glau  
ben inn Ihesum Christum.

Abraham hat gegleubt/ vnd es ist ihm z  
gerechnet zur gerechtigkeit.

Die weil durchs gesetz niemand from ge  
macht wird fur Gott/so ist offenbar/ das  
der gerecht leben wird durch den glauben.

Christus hat vns erlöset von der verma  
ledeyung des gesetzes.

Inn Christo Ihesu haben wir die erlö  
sung durch sein blut/nemlich die vergebung  
der sünden. Ephē. 1

Gott/der reich ist von barmhertzigkeit/ z  
durch sein grosse liebe/damit er vns geliebet  
hat/da wir tod waren inn sünden/hat er vns  
mit Christo lebendig gemacht.

Durch Christum haben wir freiheit vnd z  
zugang inn der zuuersicht/durch den glau  
ben inn ihn.

Christus ist mein leben vnd sterben/ Philp. 1  
mein gewin. Colos. 1

Gott hat Christum aufferweckt von den  
todten/vnd vns mit ihm lebendig gemacht/  
da wir tod waren inn den sünden/vnd hat  
vns gescheneckt alle sünde/vnd ausgetilget die  
handschrift/welche vns entgegen war/vnd  
hat sie hingenomen/vñ an das creutz gehefft.

Das ist ihe gewisslich war/vñ ein thewer 1. Th. 1  
werdes wort/das Christus Ihesus komen ist

B ij iiii



inn die welt/die sunder selig zu machen.

2 Gott begert/das alle menschen genesen/  
selig werden/vnd zur erkentnis der warheit  
komen/Denn es ist ein einiger Gott/vnd ein  
einiger Mittler/zwischen Gott vnd den men-  
schen/ Ihesus Christus/der sich selbs gege-  
ben hat fur ierman zur erlösung.

2. Thl. 1. Gott hat vns selig gemacht/nicht nach  
vnsern wercken/sondern nach seiner gnaden/  
die vns gegeben ist inn Christo Ihesu/der  
dem Tod hat die macht genomen/vnd das le-  
ben ans licht bracht durchs Euangelion/  
das ist gewislich war/Sind wir mit gestor-  
ben/so werden wir mit leben. Dulden wir/so  
werden wir mit herschen/ verleugnen wir/so  
Tit. 2. wird er vns auch verleugnen/gleuben wir  
nicht/so bleibt er trewe vnd warhafftig/ Er  
mag sich selbs nicht verleugnen.

Christus hat sich selbs fur vns gegeben/  
auff das er vns erlöset von aller vngerechtig-  
keit.

Gott hat vns nicht vmb der werck wil-  
len der gerechtigkeit/die wir gethan haben/  
sondern nach seiner barmherzigkeit selig ge-  
macht.

Ihr seid nicht mit vergenglichem silber  
odder golt erlöset / sondern mit dem thewren  
blut



blut Christi/als eins vnschuldigen vnd vnbe-  
flechten lambs.

Christus hat gelitten fur VNS / vnd <sup>2</sup>  
vnser sunde selbs getragen an seinem leib/  
an dem holz / auff das wir der sunden los  
würden.

Christus hat ein mal fur VNS gelit-  
ten/der gerecht / fur die vngerechten / auff <sup>3</sup>  
das er vns Gott zufüre.

So wir sagen/wir haben keine sunde/so <sup>1. Joh. 1.</sup>  
verfüren wir vns selbs / vnd die warheit ist  
nicht inn vns / So wir aber vnser sunde be-  
kennen / so ist Gott trewe vnd gerecht / das  
er vns die sunde verzeihet.

Das blut Ihesu Christi macht vns rein  
von allen sunden.

So iemands sündigtet/so haben wir ein <sup>2</sup>  
fürsprecher bey Gott / Ihesum Christum/  
der gerecht ist / vnd derselb ist die versünung  
für vnser sunde.

Was grosser liebe hat vns der Vater ge-  
ben/das wir Gottes kinder sollen heissen.

Christus ist seinen brüdern gleich wor-  
den/auff das er barmherzig würde / vnd ein <sup>Hebre. 2</sup>  
trewer hoher Priester vor Gott / zuuersünen  
die sunde des volcks.

Im newen Testamēt (spricht der Herr)  
Ich wil gnedig sein ihrer vngerechtigkeit/  
vnd ihrer sunden wil ich nicht mehr geden-  
cken.

B iii Qv



11 On glauben ist vnmöglich/das einer  
Gott gefalle.

12 **HERRT**/vnd lasse nicht ab/wenn du von  
ihm gestrafft wirst/denn wilchen der Herr  
lieb hat/den strafft er/Er geislet aber ein  
jglichen den er annimpt/ Wo ist ein son/den  
der vater nicht züchtiget? Seid ihr aber on  
züchtigung/so seid ihr bastart vn nicht ehel  
Kinder.

## Summa vnd innhalt

des ganzen Euangelions/dem  
franccken auff obgemelte vn  
terrichtung/kürzlich  
fürzusagen.

**N**ach ausweisung des Euangelij/  
hörest vnd weifestu / vnd solts auch  
festiglich glauben / das Christus sein  
leben/zu einer erlösung für deine sünde  
hat gegeben/vnd vmb deiner sünd wil  
len gestorben / begraben / vnd auffers  
standen ist/das du nicht verloren seist/  
sondern habest das ewige leben / vnd  
vom tod zum leben hindurch dringest/  
vnd nicht ewiglich gerichtet werdest/

Das



Das du aus gnaden / durch sein blut / on  
deine wercke vnd dein verdienst / from /  
gerecht vnd selig werdest / Das du ein  
zugang zum Vater habest / durch ihn  
Das du ein kind Gottes bist / vnd ein  
erbe des himelreichs / Kürzlich / das  
Christus dein mitler / fürsprecher / helfs  
fer / gnugthuung / gerechtigkeit / hoff  
nung / trost / leben / seligmacher / erlöser  
vnd Heiland ist / vnd dich nicht lassen  
wil / wenn gleich alle Creaturn dir wid  
der weren / Inn diesem glauben las dich  
finden / der wird dich ewiglich erhal  
ten / Da vermag sund / welt / hell vnd  
Teuffel nicht fur / denn Christus hat des  
nen ihr macht alle genomen / kan / vnd  
wil dich ihnen entfüren / vnd zu seinen  
gnaden ins ewig Paradis nemen.

## Beicht dem kranck en fur zu sagen.

O Allmechtiger ewiger Gott / barm  
herziger himelischer Vater / Du  
hast mich nach deiner bildung geschaf  
fen



fen / vnd mit vberschwenglichen güttern begabt / Doch vnangesehen / solche deine wolthat / hab ich dein gepot inn viel wege / veracht vnd vbertretten / all mein lebenlang / wie ein vnvernunfftig thier / irre gelauffen / die gaben so du mir gegeben / nicht zu deiner ehre / vnd nutz meines nehisten angelegt / habe mich inn bosheit vnd sunden geübt vnd gefliessen / vnd alle meine tage / sind mit schweren sunden hingeflossen / Der halben ich billich verdampt sein / vnd dich fürchten vnd fliehen solt / als einen gestrengen richter. Tu aber O himelischer Vater / Kome ich zu dir / vnd ruffe an / die tieffe deiner gnaden / Ich erkennne meine tödliche franckheit / vnd entdecke sie / Ich hab inn den himel vnd dich gesündigtet / vnd bin nicht würdig dein kind genand werden / Herr sey mir armen sunder gnedig / Vnd dieweil ich / O Herr Ihesu Christe / mein sund nicht büffen / odder gegen dem Vater abtragen kan / lege ich sie auff dich / nim sie hinweg



hinweg/denn du hast bezalt / was wir  
verschult haben / vnd vnser krankheit  
vnd wunden hastu gelitten vnd geheilt.

## Ein ander Beicht.

**I**ch armer sunder beken öffentlich/das  
ich meinen Gott / Schöpffer vnd er-  
löser/von hertzen nie recht geliebt hab/  
seiner Göttlichen gepot keins gehalten/  
seinem willen vielfeltiglich widder-  
strebt/auch brüderliche liebe gegen mei-  
nem nehisten noch nie recht bewisen  
hab. O barmhertziger Got/ Herr himli-  
scher Vater/mein natur/mein entpfeng-  
nis vñ anhebens wesen/ist sund / ich wil  
geschweigen/der dancken/wort / werck  
vnd gantzen lebens/ Ein boser baum  
bin ich / vnd von natur ein kind des  
zorns/Das alles/wie das namen haben  
mag/es sey heimlich odd er öffentlich/  
bekenne ich mich/vnd hab hierinne ein  
misgefallen vnd rewe/Darumb schreie  
vnd ruffe ich zu dir Gott mein Herr/  
bite dich hertzlich/mir dein barmhertzig-  
keit



Zeit gnediglich mitzuteilen / die du mir  
auch / nach inhalt des Euangelions/  
durch deinen auserweleten Son Ihes  
sum Christum verheissen hast / daran  
ich nicht zweitel / O Herr deine wort  
sind war / Mir geschehe nach deinen  
worten.

## Ein ander Beicht.

**A**lmechtiger Gott / ich bekenne dir  
öffentlich meine grosse sünde / elend  
vnd jammer / das ich nie so starcke zu  
uersicht vnd vertrauen zu dir gehabt/  
das ich alle ding verlassen / mein creutz  
auff mich genomen / dir nachgesolget/  
vnd mich dir / gantzlich ergeben hab/  
Auch so kan ich mit warheit nicht sa  
gen / das ich dich ihe von hertzen / aus  
meiner seel / vnd mit gantzen krefften/  
geliebt hab / ja ich hab dich erzürnet/  
widder dich gethan / dein wort vnd  
wolthat vergessen / meinem nehisten nie  
rechte trewe / hülff / furdernus / ehre vnd  
wolthat bewiesen / Ist mir alles von  
grund



grund meines hertzen leid/ Bit dich alls  
mechtiger Gott/ Herr himelischer Va-  
ter/ las mich nicht inn der tieffe meiner  
sunde sticken / sondern hilff mir gnedig-  
lich heraus / durch Christum Ihesum  
vnsern Herrn,

## Ein ander Beicht.

Almechtiger / ewiger / barmhertziger  
Got vnd Vater/ Sihe / in vntugent bin  
ich gemacht / vnd inn sunden entpfing  
mich mein mutter/ Dir bekenne ich alle  
meine sund vnd missethat/ deinen wor-  
ten hab ich nicht geglaubt/ vnd von dei-  
nem wege bin ich abgewichen / eitel  
vbertretung ist mein gantz leben / Ges-  
denck Herr an deine barmhertzigkeit  
vnd an deine güte/ die von der welt her  
gewesen ist/ Gedencck nicht der sund mei-  
ner jugend vnd meiner vbertretung/  
Gedencck aber mein nach deiner barm-  
hertzigkeit vmb deiner güte willen/  
vnd vmb deines namens willen / Herr  
sey gnedig meiner missethat / die gros  
ist. Ich



## Sebet.

Ich dancke dir allmechtiger Gott/  
himelischer Vater/ das du mich ein  
vernünfftigen menschen geschaffen hast/  
verstand deines worts / auch zeitliche  
narunge gegeben / mich fur grossen fer-  
ligkeiten / von Kindauff bisher behüt/  
vnd mir mehr gethan hast / denn ich  
immer werd worden bin / Sonderlich  
dancke ich dir deiner gnaden/ die du mir  
vnd allen gleubigen erzeigest / durch  
Christum / deinen aller liebsten Son/  
das der sich vmb meiner sunde willen/  
inn viel ansechtung / widderrwertigkeit  
vnd schmehelichen tod gegeben hat/das  
mit ich mich furder eins getrewen beis-  
stands vertrosten möcht/ Auch dancke  
ich dir lieber Vater / das du mich mit  
dieser krankheit heimsuchst / vnd nicht  
hast lassen sterben / on erkenntnis des  
Euangelions / diesen trost vnd süßig-  
keit hab ich zuuor nie gewist / vnd so  
ichs nu aus lauter deiner gnaden erfa-  
ren/vnd



ren/ vnd die rechte warheit erkenne / danck  
ich dir/ vnd bitte dich / beweise meiner ar-  
men seelen inn dieser grösten not / deine  
hülffe vnd trost/ vnd verleihe mir gedult/  
Amen.

## Sebet.

Almechtiger ewiger Gott / barmher-  
ziger Vater / nim für meine sünde die  
gnugthuung vnd die bezalung deines  
eingebornen Sons unsers Herrn Ihesu  
Christi / O Herr Gott Vater / las mich  
geniessen seines leidens / erlöse mich von  
allen sünden / straff mich nicht inn dei-  
nem grimmigen zorn/ vnd gehe nicht mit  
mir inn das gericht / gib mir gedult inn  
meiner krankheit/ vnd verlas mich nim-  
mer inn ewigkeit / Amen.

## Sebet.

Lob/ Ehr vnd danck / sey dir mein  
aller liebster Herr Ihesu Christe / für  
dein heilige menschwerdung / für dein  
marter vnd bitters leiden / aus den ich er-  
kenne



erkenne/das du mein erlöser vnd seligmacher bist/ vnd gleub das du /sunde/hell vnd Teuffel / vberwunden hast/ das die mir nicht schaden mügen / des allein vertröste ich mich / darauff barwe ich/da stehet mein hoffnung/da wil ich mich lassen finden/allein sey mir gnedig vnd barmherzig / wie ich deiner warhafftigen zusagung nach / nicht zweivel / O Herr / las mich nicht inn diesen grossen nöten.

### Sebet.

O Herr Ihesu Christe/alle die inn dich getaufft sein / die sind inn dein tod getaufft/ Ich bin inn dich getaufft/drumb bin ich auch inn dein tod getaufft/wil mit deiner hülff frölich vnd gern sterben/der hoffnung / wie ich deiner trübsal teilhafftig sey / ich sol auch deiner ewigen glori teilhafftig werden.

O Herr Ihesu Christe/du hast am Creutz gebeten/Vater verzeihe ihn/also Herr verzeihe ich allen/die widder mich gehandelt



händelt haben / auff das du mir alle mei  
ne sünde verzeihest.

O Herr Ihesu Christ / du hast am  
Creutz geruffen / mein Gott / mein Gott /  
wie hastu mich verlassen? Herr / verlas  
mich nicht inn meinen tods nöten.

O Herr du hast am Creutz gespro  
chen / Vater / inn deine hende befihl ich  
meinen geist / also Herr szund befihl ich  
mein arme seele inn deine hende.

**S**o der kranck frölich  
vnd getrost ist zu sterben / so  
sage ihm also fur.

O Herr Ihesu Christe / ich bitte dich  
durch deine güte vnd barmherzigs  
keit / du wöllest meine seele stercken auff  
den ferren weg / der mir furstehet inn ein  
vnbekant land / Ich gleub das du vmb  
meiner willen gestorben / mir mein sun  
de aus deiner gnadē verzeihen / vnd das  
mir das ewig leben zugesagt ist / dieses  
meines glaubens O Herr soltu ein zeug  
G ge sein



ge sein / vnd alle deine aufferwelken. Dis  
sol auch mein letzter wil sein / inn sol-  
chem glauben O Herr / auff dein lauter  
barmherzigkeit zusterben. Vnd ob ich  
durch schmerzen / vniernunfft / odder  
andere anfechtung wurde / odder wolt  
abfallen / O Herr so las mich im vnglau-  
ben vnd Gottslesterung nicht stecken /  
sondern stercke vnd mehre meinen glau-  
ben / das mir sund / helle / vnd Tenffel  
nicht schaden. Du bist stercker vnd ges-  
waltiger denn die alle / darauff verlasse  
ich mich / Herr las mich nicht zu schand-  
en werden.

### Inn vngedult des kran- cken / Bete ihm fur.

O Herr Ihesu Christe / das fleisch ist  
schwach vnd vngedultig / Ach lieber  
Herr / brenne / hawe / stiche / vnd plage  
mich wie du wilt / allein bitte ich dich  
vmb gedult vnd sanfftmütigkeit.

Wenn



Wenn der kranck vom  
Teuffel versucht wird / so bitte  
mit ihm.

O Himmelscher vater / Erbarme dich  
deiner creatur / vñ kome mir zu hülff/  
inn diesen erschrecklichen anleuffen vnd  
versuchungen / errette meine sele inn dies-  
sen grossen nöten / von den hellischen  
hunden.

### Inn verzweuelung des krancken bitte.

O Herr Ihesu Christe / mehre meinen  
glauben vnd vertrauen inn dich / das  
ich nicht an deiner Göttlichen gnade  
verzage / vnd nicht inn der aller grösten  
sünde / dem vnglauben / verzweuele / O  
Herr da behute mich fur / Dein verheis-  
sene gnad im heiligen Euangelio / las  
nicht aus mein hertzen komen / Du bist  
mein einiger trost / vnd hoffnung / stehe  
mir bey / inn dieser angst / las mein arme  
seele nicht inn die hende meiner grausam-  
en

C ij men



men feinde komen / vnd gestat ihm kein  
gewalt vber mich / sondern beweise an  
mir dein güte zu dieser stund / den du bist  
mein seligmacher vnd erlöser.

**S**prüche / vnd die aller  
schönsten bitte / aus allerley psalmen /  
im tods nöten zu brauchen.

psal. 6. **A**ch Herr straff mich nicht in  
deinem zorn / Sey mir gnedig /  
denn ich bin schwach. Mein  
seele ist seer erschrocken / Ach  
du Herr wie lang?

Wende dich Herr / vnd errette mein  
seele / vmb deiner güte willen.

7 Auff dich trawe ich mein Gott / hilff  
mir vnd errette mich.

9 Sey mir Herr gnedig / Sihe an mein  
elend vnter den feinden / der du mich er-  
hebest aus den dornen / des tods.

22 O Herr du hast mich aus mutter leib  
gezogen / du bist mein zuuersicht / da ich  
noch an meiner mutter brüst ware.

Mach



Mach dich nicht ferne von mir / denn  
angst ist nahe / vnd ist hie kein helffer.

Ich bin ausgeschüt wie wasser / alle  
mein geben habe sich zertrent / vnd mein  
hertz ist worden jnn mein leib / wie zers  
schmolzen wachs.

Mein kressft sein vertrockent wie ein  
scherbe / vnd mein zung klebt an meinem  
gummen / aber du Herr mein stercke / eile  
mir zu helffen.

Machs nicht lang / denn ich bin ganz  
krasslos.

O Herr erquick mein seele / vnd füre 27  
mich auff rechter stras / vmb deines nas  
mens willen / vnd bleib bey mir.

Zu dir erhebe ich meine seele / mein  
Gott / ich hoff auff dich / las mich nicht  
zu schanden werden / Denn keiner wird  
zu schanden / der deiner erharret.

Du bist der Gott meus heils / gedencf  
an dein barmhertzigkeit / vñ an dein güt  
te / die von der welt her gewesen ist.

Gedencft nicht der sunde meiner ins  
gent / vnd meiner vbertretung / gedencf

C iij aber



aber mein nach deiner barmhertzigkeit/  
vntb deiner güte willen.

Vntb deines namens willen Herr/sey  
gnedig meiner grossen missethat.

Wend dich zu mir vnd sey mir gnes  
dig/denn ich bin elend.

Die angst meines hertzens ist gros/  
füre mich aus meinen nöten.

Sihe an mein jammer vnd elend/vnd  
nim weg alle mein sunde.

Beware mein seele/vnd errette mich/  
las mich nicht zu schanden werden/denn  
ich traw auff dich vnd harre dein.

Ich hoff auff dich / O Herr erlöse  
mich/vnd sey mir gnedig.

Der Herr ist mein liecht vñ mein heil/  
für wem sol ich mich fürchten?

Der Herr ist meins lebens krafft / für  
wem solt mir grawen?

Ob sich widder mich ein heer legt/ sol  
sich doch mein hertz nicht fürchten.

Ob sich ein streit widder mich erhübe/  
wil ich mich auff dich verlassen.

Verbirge dein andtlig nicht für mir/  
vnd



vnd verstoß nicht im zorn dein knecht/  
denn du bist mein hülf / las mich nicht/  
vnd thue nicht von mir dein hand ab/  
O Gott mein heil.

Der ist mein stercke vnd mein schild/ 28  
auff ihn hoffe mein hertz.

Herr auff dich trawe ich / las mich 31  
nimmer zuschanden werden.

Neige deine oren zu mir / eilend errette  
mich.

Du bist mein fels vnd mein burg / vmb  
deines namen willen wollestu mich leis-  
ten vnd führen.

In deine hend befihl ich meinen geist/  
Herr du trewer Gott / erlöse mich.

O Herr sihe mein elend an / vnd erkens-  
ne mein seele inn der angst.

O HERR ich hoff auff dich / du bist  
mein Gott.

Mein seligkeit stehet inn deinen hend-  
den / hülf mir durch dein güte.

Herr las mich nicht zuschanden wer-  
den / denn ich ruff dich an.

Du bist mein schirm / du wollest mich 32  
für angst behüten.

E iij O Herr



34 O Herr hilff mir aus allen meinen nö-  
ten/streitte widder mein bestreitter/vnd  
mach dich auff/ mir zu-helffen.

35 Wach auff zu meiner sache/ mein  
Gott vnd Herr.

40 O Herr wie lang wiltu zusehen/ Herr  
mach dich nicht ferne von mir.

O Herr wollest dein barmherzigkeit  
nicht von mir wenden/ errette mich/vñ  
eile mir zu helffen.

44 Mach dich auff/hilff mir/vnd erlöse  
mich vmb deiner güte willen.

51 Gott sey mir gnedig nach deiner gü-  
te/vñ tilge meine vbertretung nach dei-  
ner grossen barmherzigkeit.

Den ich erkenne meine vbertretung/  
vnd meine sund sein immer fur mir.

An dir allein hab ich gesundet / vnd  
vbel fur dir gethan.

55 Verwirff mich nicht von deinem an-  
gesicht.

Gott erhöre mein gebet / merck auff  
mich/stehe mir bey vnd enthalt meine  
seele.

Sorcht



Sorcht vnd zittern ist vber mich kom-  
men vnd grawen hat mich vberfallen.

Sey mir gnedig Gott / sey mir gne- 57  
dig / denn auff dich trawet mein seele /  
vnd vnter dem schatten deiner flügel  
hab ich zuflucht.

Höre Gott mein klage / vñ merck auff 60  
mein gebet / denn du bist mein zuuersicht /  
ein starcker thurn fur meinen feinden.

Errette mich aus dem todt. das ich  
nicht versincke.

Erhöre mich / vnd wende dich zu mir 69  
nach deiner grossen barmherzigkeit.

Ich bin elend vnd arm / Gott eile zu 70  
mir / denn du bist mein hülff vnd erret-  
ter / Herr verziehe nicht.

Herr ich trawe auff dich / las mich  
nimer zuschanden werden / denn du bist  
mein zuuersicht / mein hoffnung von mei-  
ner iugent an.

Gott sey nicht ferne von mir / mein  
Gott eile mir zu helffen.

Tröste die sele deins knechts / denn du 86  
Herr bist gut / vnd gnedig von grosser

C v güte



güte/ allen die dich anruffen:

Zur zeit der not ruff ich dich an/wend  
dich zu mir / sey mir gnedig/ gib deinem  
Knecht dem stercke.

Du bist barmherzig vñ gnedig/ Lang  
mütig/ vnd von grosser güte vnd trewe.

116. Stricke des tods haben mich umbfan  
gen/ vnd angst der hellen haben mich  
trossen/ O Herr errette mein seele.

238. Herr dein güte ist ewig / das werck  
deiner hend wöllestu nicht lassen.

Herr gehe nicht ins gericht mit dei  
nem Knecht / den fur dir wird kein lebens  
diger rechtfertig sein.

Herr füre mein seele aus der not/ vmb  
deiner gerechtigkeit willen / denn ich bin  
dein Knecht.

## Sebet.

psal. 23  
25. 32. 33  
46. 59.  
61. 144

O Mein Gott / mein Herr / vnd mein  
Vater / itzund beweise meiner armen  
seelen/ das sie imten werde / das du seiest  
mein fels / burg / schild / thurn / hort / schutz  
zuversicht / hilff / zuflucht / schirm / vnd  
güte



güte / das ich inn diesen grossen nöten  
für meinen feinden / durch dein Göttlich  
gnad / hülff vnd beistand behalten wer-  
de / Herr auff dich trawe ich / las mich  
nimer zu schanden werden. Inn deine  
hende beuehlich mein geist. Herr du  
trewer Gott erlöse mich / Amen.

## Wenn du vom kranck- en gehest so sage.

**V**W deiner angst vnd not ruff den  
Herrn an / vñ schrey zu deinem Gott /  
so erhöret er dein stum / vnd dein geschrey  
kompt für ihn zu seinen oren / Vnd Gott  
der dich beruffen hat / zu seiner ewigen  
herligkeit inn Christo Ihesu / der selbig  
wird dich / der du ein kleine zeit leidest /  
volbereiten / stercken / krefftigen / gründen  
vnd selig machen. Dem selbigen  
sey preis vnd macht von  
ewigkeit zu ewigkeit  
Amen.



# Ein ander vn- terricht / den Sterben-

den menschen ganz tröstlich vnd  
seliglich fürzuhalten / an ihrem  
letzten ende / mit einer Vors  
rhede D. Mart.  
Luthers.

**C**hristus vnser  
Herr / da er funff tausent  
man / mit funff gerstē brod  
gespeiset hatte / hies er sei-  
ne Jünger die vbrigen brocken samlen /  
das nichts umbkeme. Johan. 6. Dem  
selbigen befehl nach / hab ich auch wöl-  
len dis büchlin auffhebē / das nicht umb-  
keme / Welchs freilich auch der guten  
brocken eine ist / so vberig ist / von der  
gnadreichen speise des heiligen Euange-  
lij / damit Gott der Vater aller gnaden  
vnd barmherzigkeit jzt die welt so reich-  
lich



lich vnd wunderlich speiset. Vnd habe  
zu solchen brocken dis körblin geflocht  
ten/nemlich/diese vorrhede/darein es ge  
fasset vnd behalten würde.

Vnd ist sein auch wol werd / Denn  
es ein nützlich büchlin ist / das nicht mit  
narrenwerck odder vnnützem geschweiz  
vmbgehet/wie jtz leider / der vnnützen/  
shedlichen bücher vñ schreiber/die welt  
vol ist/sondern von der rechten notsach  
en vnd heubtstücke handelt / welche die  
Schwermegerister vnd tollen heiligen  
schie gar vertunckelt haben/mit ihrer  
grossen vberschwenglichen weisheit vñ  
flugheit/da vns Gott fur behüte.

Denn es haben auch vnser widder  
sacher dis büchlin/selbst lassen drücken  
vnd ausgebreit /ehe denn wir/damit sie  
bekennen / das freilich/nichts böses son  
dern eitel guts drinnen sey/das sie selbst  
loben vnd ehren müssen. Tu ist ja kein  
Papistische lere/sondern die rechte Lu  
therische (wie sie es nennen) drinnen.  
Nach



Nach dem es offenbar ist / das alle Pa-  
pisten auff einen hauffen / mit alle ihrer  
Kunst / nicht vermögen ein solchs buch-  
lin zu machen / es sey wie klein es wölle /  
Denn sie haben solchen verstand nicht.

Vnd wil wol glauben / wo mein na-  
me odder sonst ein bekanter Lutherischer  
name drauff gestanden were / sie het-  
tens widder gedruckt noch gelesen / wie  
den offtmals sie auch meine eigen buch-  
er gelobt vnd gerne gelesen haben / wenn  
mein name dauon gerissen ist. Also ein  
böhs ding ist mein name / wenn er auff  
ein buche stehet / so ist böse / es sey wie  
gut es wölle / Wenn er nicht drauff ste-  
het / so ist gut / es sey wie böse es wölle.

Ich habe auch gar nichts zu dies-  
sem buchlin thun noch endern wöllen  
(welchs ich auch nicht wol wuste zu  
thun) sondern hab es lassen inn seiner  
masse vnd gestalt ganz vnd gar blei-  
ben / wie ichs gedruckt bekommen habe /  
auff



auff das ichs nicht etwa verderbete/  
vnd mit meinem vberklügen ihm seine  
natürliche krafft vnd safft neme /odder  
den geschmack beraubete/wie gemeinige  
lich guten büchern geschicht/ wenn meis  
ster klügling drüber kömpt/wie den meis  
nem neuen Testament auch geschehen  
ist/das der lesterer vnd suddeler in Meis  
sen/sur das seine hat auslassen gehen.

Bitte derhalben alle lieben freunds  
de/beide Prediger vnd hörer/woltē sich  
auch also vleissigen/vnd dis heubtstück  
der Christenlichen lere/nemlich den glau  
ben/helffen treiben vnd vben/ Denn die  
tollen heiligen / Papisten vnd Bottens  
geister / verstehen warlich nicht / was  
dis stücke ist/drümb treiben sie es auch  
nicht/können auch nicht. Vnd der Teufel  
sucht durch alle ihre tolle heiligkeit  
vnd gesterey/nicht schlecht ihr tolle heis  
ligkeit auff zurichten / sondern viel mehr  
dis heubtstück / das ihm den kopff zu  
trit/vnd sein reich zustöret/zu vertilgen/  
Es



Es ligt ihm furwar an andern stücken  
nicht so hart / Darumb lasse vns wacker  
sein vnd fursehen / Er schlesse nicht / Er  
sucht vnd treibt ebenturliche griffe / den  
glauben / vnd damit die rechte kirche zu  
stürzen vnd zustören. Christus  
vnsrer Herr sey mit vns vnd vers  
lasse vns nicht. Welchem  
sey lob / ehre vnd danck  
im ewigkeit /  
Amen



# Thomas Venatorius

Dartungo Görel / Gnad vnd frid  
von Gott dem Vater etc.



## Sanct Paulus er

manet die Thessalonicenser / <sup>1. Tess. 4</sup>  
das sie sich nicht bekümmern  
sollen der halben / so entschlaf  
fen sind / als etliche Heiden pflegen zu  
thun / die keine hoffnung der auferste  
hung haben. Denn glauben wir / das Ihes  
sus gestorben vnd auferstanden ist / so  
wird Gott auch die / so entschlaffen sind /  
durch Ihesum mit ihm führen. Dieweil es  
nu nicht Christlich ist / vmb die verstorbe  
nen fast oder vnchristlicher weise traurig  
keit zu tragen / mus von nöten auch vn  
christlich sein / nicht begeren mit Sanct  
Paulo / odder auff's wenigst nicht wöl  
len entledigt werden / von diesem sundlich  
em leben / auff das der mensch ganz inn  
Gottes reich gefurt / vnd aller sunden  
D ledig



ledig werde. Denn wer inn dem Herrn den  
Tod vberwindet / odder seliglich ent-  
schleffe / wie Sanct Paulus sagt / der ist  
Rom. 6. gerechtfertigt von den sundē / wie wir den  
alle tage begeren / das Gottes name vol-  
kommen inn vns geheiligt werde / das sein  
Reich zu vns kome / vnd der sunden reich-  
gang verderbet werde / Welchs denn  
nicht reichlicher komen kan odder mag /  
denn so wir sterben. Denn am todbette  
greiffst Gott erst recht an / vnsern alten  
Adam / wiewol er zuvor solchs angefan-  
gen hat inn der Tauffe / aber im tod vol-  
streckt er erst sein gnadenreichen angriff  
an vns.

Dennach ist / wie im buch der psal-  
Psal. 37. men geschrieben stehet / nichts böfers  
denn des sunders tod / das ist / inn wel-  
chem Gott den alten menschen nicht  
nach der art seiner gnaden erwürget /  
Vnd ist auch nichts theurers vnd seli-  
gers vor Gott / denn das sterben seiner  
heiligen / das ist / bey welchen er teglich  
den eusserlichen menschen / nach der art  
seiner



seiner gnaden zerbricht / auff das der innerliche mensch von tag zu tag vernewet werde.

Von den selbigen zu trösten an ihrem letzten ende/wil ich dir/nach meinem kleinen verstand / denn du solchs inn sonderm guten vertrauen von mir begere hast/vnterricht geben/das dir inn solchem deinem ampt nicht viel abgehen sol/so du anders auch mit vleys der heiligen schrift verstand nachlesen würdest/ Denn es nicht allein mir / sondern auch den hochgelerten leuten / allen fellen / so sich bey den sterbenden teglich zutragen/vnmüglich ist zu begegnen. Es mus ein diener durch sich selbs alle tag mit vleys der heiligen schrift warnemen / wie er den krancken inn todes nöten trösten wolle.

Vnd wiewol aber vns wissend ist / das vnser trösten nichts zur seligkeit thut / es gebe denn Gott innerlich seinen trost/ Wie denn auch das predigen kein frucht bringet bey den menschen / es gebe

D ij      denn



denn Gott sein seggen dazu / wie Sanct  
Paulus spricht. Der da pflanzet ist ni-  
chts / vnd der da begehret / ist auch ni-  
chts / sondern Gott der das wachssen  
gibt. Also bestehet auch der feste grund  
Gottes / vnd hat dis siegel / Der **HER**  
kenet die seinen. So erfodert doch  
Christliche liebe von vns / das wir gar  
nichts vnterlassen / das dem sterbenden  
bruder zu guter ermanung vnd trost  
reichen mag / dieweil vns verborgen ist /  
das gerechte vrtail Gottes. Denn wie  
auch der glaub aus dem hören des Göt-  
lichen worts kömpt / also mag auch on  
zweffel / Gottes wort wunderlich durch  
das trösten wircken / das dem kranken  
der glaub an seinem letzten ende geschens-  
chet mag werden / wie denn dem Schez-  
cher am Creutz geschehen ist. Denn wo  
Gottes wort mit ernst gebraucht wird /  
kan es nicht on frucht zu Gott widder-  
keren / wie er denn selbs durch Esaiam ge-  
sprochen hat.

Tu magst du aber also zu der sachen  
greiffen



greiffen. Zum ersten / so ermane den  
sterbenden bruder / das er inn die welt  
kommen sey / nicht das er darinne bleiben  
sol / denn das were im elend geblieben /  
sondern das er mit der zeit / wenn Gott  
wil / dis elenden lebens erbeit hinweg  
lege vnd ausziehe / durch dis zeitlich ab-  
sterben / sich weitter nicht mehr mit die-  
sen middern vnd zeitlichen gütern der  
welt / sondern mit hohen vnd Göttlich  
en dingen vber vnd bekümmern sol.  
Welchs on zweuel nicht volkömlich  
geschehen mag / es sey denn dieser leib  
mit seinem leben hinweg gelegt. **Aber**  
solchs hinweg legen odder abscheiden /  
ist nicht eines menschen allein / odder  
zweier / odder etlicher inn sonderheit /  
sondern es ist alle Adams kinder inn ei-  
ner gemein belangen. Denn dieweil  
wir alle inn Adam gesündigtet haben /  
so sind wir auch alle schuldig der straff  
die Gott der vbertretung seines gepots  
auffgesetzt hat / welcher straff nicht der  
geringst teil ist dieser zeitlich tod.

1  
Was  
umb der  
mensch  
inn diese  
welt ko-  
men sey.

Aber  
Sterben  
ist ider  
man ges-  
mein.

D ij So



1. Cor. 2. So aber dis fleisch nicht recht vns  
Fleisch teilt vnter Göttlichen vnd menschlich,  
ist blind en dingen / ia es vermags auch nicht /  
in Göttern / Denn Göttliche ding sind ihm eine tora-  
lichen heit / wie Sanct Paulus sagt. So kan  
dingn. es auch nicht erkennen von ihm selbs /  
Roma. 8. das dieser enge weg zu dem rechten les-  
ben füre. Darumb erschrickt auch der  
mensch / wenn er von dem tode höret re-  
den / odder so er von ihm selbs zu zeitten  
daran gedencft. Was möchte den Kö-  
nig Ezechiam höher erschreckt haben /  
denn das er von dem Propheten Esai-  
Esai. 37. höret? Bereite dich / du wirst sterben vnd  
nicht leben / O wie mit engstigem hertze-  
en beklaget er solchs verkündigen / Gne  
zweifel hat er vor seinen augen gesehen  
die straff der sünde / das ist / tod / hell /  
Gottes zorn / vnd ewiges verdammis /  
Aber im dieser seiner grösten not vnd  
angst / wendet er sich von allen creatu-  
ren / als die ihm nichts helffen können /  
vnd keret sich zu Gott / als der allein trös-  
sten vnd helffen müge / Vnd durch sein  
glaubreich



glaubreich gebet / erlanget er erlengerung  
seines lebens vnd widderruffung des er-  
sten vrteils zum tod.

Darumb aber hab ich solchs itze  
gesagt / lieber bruder / das du dich abwende  
dest von allen creaturn / weib / kindern /  
gütern vnd zeitlichen ehren / vnd bereest  
dich allein zu Gott / der vns auff diesem  
engen wege allein hindurch helffen mag /  
Denn da sind alle creaturen zu schwach /  
Ehelich gemahel / kinder thun hie keine  
hülff / so hat auch zeitlich gut / ehre vnd  
gelt / kein ansehen im zukünfftigen vater-  
land. Darumb als wenig die welt mit  
silber odder gold von sunden frey vnd  
ledig ist worden / sondern allein durch  
das therwer blutuergiessen Christi / als  
eines vnschuldigen vnd vnbesleckten lam-  
leins / als wenig mügen alle creaturen /  
weib / kind / silber / gold / hülffereichen / auff  
diesem engen wege zur seligkeit.

Was dē  
sterben /  
den von  
nōtē sey.

1. Pet. 1.

Ob dich aber der grausam anblick  
des tods erschrecken wolt / so wende dich  
D iij danon



Joh. 16.

dauon/ vnd lere dich mit alle deinen gedancken allein zu dem/ dahin du durch diesen tod komen solt / nemlich / zu den reichen gütern Gottes/ Gedencck an die wort / die dir dein meister Christus zu trost gesagt hat. Ein weib wenn sie gebirt/ so ist sie trawrig/ Wenn sie aber das kind geporn hat/ gedencckt sie nicht mehr an die angst/ vmb der freude willen / das der mensch inn die welt geporn ist. Also hat auch dis vnser zeitlich leben / nichts anders denn angst / not vnd sterben / so lang bis wir gar aus dem leib dieser welt/ zu dem vnuergenglichen vnd ewigen leben geporn werden.

Der christlich mit leiblichen augen/ Es hats Gott  
sten lebē der welt verborgen / Aber die recht glau-  
verbor / bigen/ sehen es mit den augen des glau-  
gen. bens/ Es entpfinden auch schon etliche  
hie auff erden / was Gott den seinen bes  
reitet hat/ Es ist aber noch nichts ge-  
gen dem / so wir empfahe werden.  
Denn



Denn Sanct Paulus sagt / das vnser  
wissen nur stückwerck sey/ Wenn aber  
das volkomen herzu kome / so entweiche  
das stückwerck auch / sagt er / Wir sehen  
igt als durch einen spiegel / aber nach  
diesem leben / werden wir Gott sehen von  
angesicht zu angesicht.

Also sihestu / lieber bruder / das vn-  
ter diesem tod / noch ein leben verborgen  
ist / Wie auch an einem andern ort S.  
Paulus spricht. Unser Tauffe bedeut  
nichts anders denn sterben der sunde.  
Tu kan ihe niemand den sunden ganz  
sterben / er lege denn diesen leib zuor  
hinweg / wie du denn zuor auch gehört  
hast.

Darumb solt du auch mercken / das  
wir alle des todes vrteil vnterworffen  
sind / vnd auch vns willig inn der Tauff  
darein ergeben. Denn wir alle die inn  
Ihesum Christ getaufft sind / sind inn  
seinen tod getaufft / wir sind auch mit  
ihm begraben / durch die Tauff inn den  
tod / auff das gleich wie Christus / ist  
D v            auffers



aufferweckt von den todten durch die her-  
ligkeit des Vaters/ also sollen auch wir  
inn einem neuen leben wandeln.

Also mercken wir / das vnser leben  
nicht hie ist inn dieser welt / sondern wir  
sind mit Christo der welt vnd den sunden  
gestorben/ vnd ist vnser leben verborgen  
mit Christo inn Gott. Wenn aber Chris-  
tus / vnser leben/ sich offenbaren wird/  
Coloss. 3. denn werden auch wir offenbar werden  
mit ihm inn der herligkeit.

Vnd das du solchs alles gewis  
werdest / so hat er dir sein heiliges wort  
Mar. 16. daran gehenget / vnd spricht/ Wer da  
glaubet vnd getaufft wird/ der wird selig.  
Das götlich wort Tu bistu ihe auch getaufft inn dem na-  
men des Vaters / vnd des Sons / vnd  
des heiligen Geistes / der hat sich ver-  
sprachen bey dir zu bleiben inn aller wid-  
derwertigkeit/ mit dir/ia fur dich zu streit-  
en widder deine feinde/ sund/ tod vnd  
bösen geist. Solchs alles hat der Va-  
ter dem Son Christo inn seine gewalt ges-  
geben



geben / also wie dem Herrn Christo der  
tod vnd auch die sünde der ganzen welt  
kein schaden gebracht hat / das dir auch  
kein schaden thun sol / sondern dir helffen  
mit dem Herrn Christo dem geliebten  
Sone zu dem ewigen leben / Sihe du nur  
eben / das dein hertz nicht wancke an dem  
veterlichen zusagen / vertrau vnd ergib  
dich gar / inn die vnaussprechliche liebe /  
die Gott der welt inn seinem Sone erzei-  
get hat / den er fur vns inn den tod des  
Creuzes gegeben hat / auff das / wer an  
den Son glaubt / habe das ewige leben /  
Wer aber dem Sone nicht glaubt / der *Joh. 3<sup>o</sup>*  
wird das leben nicht sehen / sondern der  
zorn Gottes bleibt auff ihm. O wie ein  
seligs zusagen / wenn wir glauben an  
Christum den Son Gottes / sollen wir  
besitzen das ewige leben. O wie ein grau-  
sam sententz vnd vrtail vber die / so dem  
Son Gottes nicht glauben / es sol der  
zorn Gottes vber ihn bleiben.

Darumb wenn dich deine sunden  
anfechten / so gedencke bald an das  
lamb *Sunde*



lamb Gottes / das die sünde der welt  
hinnimpt / Gedencke das Christus vns  
1. Cor. 1. von Gott gemacht ist zur weisheit / zur  
gerechtigkeit / zur heiligung vnd zur er-  
löfung. Gedenck das er am Creutz vn-  
ter die vbelheter gerechnet ist worden /  
das er verwundt ist worden / von wegen  
vnsrer missethat / vnd das die straffe vns-  
erer sünden vber ihn gegangen ist / Ges-  
denck auch / das vns Gott so hoch ges-  
2. Cor. 5. liebt hat / das er den / der keine sünde  
wusste / für vns zum opffer für die sünde  
gemacht hat / auff das wir inn ihm wür-  
den die gerechtigkeit / die für Gott gilt  
vnd bestehen mag. In summa / Nim  
dich auff dismal deiner sünd nichts an /  
vnd verlas dich allein auff die gützig-  
keit Christi / der ist dir vnd der ganzen  
welt geporen / er ist dir gegeben / er ist dir  
gestorben dir auferstanden / Vnd wie  
er deine sünd durch seinen tod vberwun-  
den hat / also erhelte er dich itzt durch  
sein leben / on zweivel inn der liebe seines  
himelischen Vaters. Wenn du solchs  
im



im rechten glauben annimpst / so kanstu  
nicht komen inn das gericht der verdamp-  
ten / sondern du kömpst vom tod zum *Joh. 56*  
leben.

Las dich auch die straff vnd pein *helle*  
der hellen nicht anfechten / denn deine  
seligkeit ist gebawet auff den starcken  
fels Christum / dem müssen alle hellisch-  
en pforten weichen / Darumb so bistu *Mat. 166*  
auch nicht allein inn diesem tod / es ist  
Christus mit dir / vnd der ist auch Gott /  
So nu Gott mit dir ist / warumb wol-  
testu dich denn fürchten auff diesem we-  
ge? Warumb woltestu den tod fürch-  
ten / dieweil er dir die thür zum rechten  
leben auffhut? Las einen ungleubigen  
den tod fürchten / der vom zeitlichen tod  
zu dem ewigen tode hingehet. Las die-  
sen vber den tod erschrecken / der nicht  
aus wasser vnd dem heiligen Geiſt ge-  
born ist. Fürcht dieser den tod / der Chri-  
stum nicht erkennet / als einen einigen  
Heiland aller welt. Las den reichen *Luce. 166*  
man / dauon vns das Euangelion sagt /  
den

Die chrt-  
sten er-  
schreckē  
nicht für-  
dē tod /  
sondern  
die un-  
gleubigē



Mat. 11.

den tod fürchten / denn er wird inn die helle begraben. Du aber solt dich freuen / denn heute wirstu mit Lazaro inn der schoß Abrahe mit allen auserwählten / die ewige rhye empfangen. Heute wirstu mit Christo vnd dem Schecher im Paradis / ewige lust vnd freude besitzen. Jzt rufft dir Christus zu ihm vnd spricht / Tu kom zu mir / deine mühe vnd last wil ich von dir nemen / vnd wil dich erquickten / nu empfahe ruhe für deine seele. Des zu warer erkund / so hastu empfangen den leib Christi / der für dich am Creutz gestorben ist / auff das du das leben vberkomest / Vnd hast getruncken sein thewres vnd kostbarliches blut / das er zur vergebung deiner sunden vergossen hat. Er hat sich genidriget / vnd ist beide dein wird vnd dein gast worden / Er hat dich gespeiset / auff das du nicht gebrechen leidest auff dem wege / vnd hat deine seele zur wohnung vnd herberg erwelet / auff das dir kein feind schaden müge.

Tu



Vu lieber bruder / so zweiffel nicht  
an Göttlichem zusagen / denn Gott hat  
dir das ewige leben versprochen / so ist on  
zweifel dieser dein hingang aus der welt /  
ein gewisser eingang zu dem leben. Das  
leben aber ist Christus / der da spricht /  
Ich bin der weg / die warheit vnd das  
leben. *Joh. 14*  
Vu magst du ihe nicht irren /  
denn Christus ist der weg / Du magst  
auch nicht betrogen werden / denn Chris-  
tus ist die warheit / Vnd kanst auch  
nicht sterben des ewigen tods / denn Chris-  
tus ist das leben / Darumb ergib dich  
willig mit alle dem / das du bist vnd ver-  
magst / deinem Schöpffer vnd erlöser /  
vnd sprich mit dem Herrn Christo / *Luc. 3*  
Vater / inn deine hende befelhe ich meinen  
geist / Amen.

Diese form / den sterbenden zu trö-  
sten / habe ich nicht darumb geschrie-  
ben / das iederman gleich daran müste  
hängen / als solt odder künd man sonst  
nichts nützlichen den sterbenden furhals-  
ten / Sondern ich habs dir vnd mir vnd  
meines



meines gleichen/als ein kleines Exempel  
furgeschrieben / aus welchem aller trost  
gezogen mag werden / Darumb mag ein  
ieder Christen mensch dis Exem-  
pel/nach gelegenheit der zeit/  
der person/bessern/min-  
dern odder  
mehrern  
nach seinem  
wolgefallen. Gott  
mehr in vns seinen  
Geist /      A M E N.



Eine Tröstung an Herzog  
Friderich Churfursten zu  
Sachsen etc. seliger vnd Christ-  
licher gedechtnis etc.

**G**ottes gnad vñ friede zunort/  
Gnedigster herr/ E. C. G.  
lasse sich nichts auff erden  
anfechten / Sondern halten  
sich nur fest an Christum/  
vnd gedencen seines tröstlichen worts/  
vnd fassen dasselb / vnd behalten es inn  
einem starcken glauben/trawen vnd hoff-  
nung/ Als sonderlich / da Christus sprich-  
t/ Math. am. ix. Die starcken dürffen  
des artzes nicht / sondern die Francken.  
Ich bin komē die sunder zur busse zu ruf-  
fen/ vnd nicht die fromen. Die selbigen  
lockt er auch so freuntlich zu ihm/ Math.  
am. xi. vnd spricht also. Kompt her zu  
mir alle die ihr müheselig vnd beladen  
seid/ich wil euch erquicken.

In kompt man zu Christo alleine  
E durch



Durch den glauben. Wenn wir gley-  
ben das vns Gott gnedig sey / das er  
vns treulich vnd wol meine / das er vns  
alle vnser sunde vergeben habe / das  
Christus für alle vnser sunde habe gnug  
gethan / das wir Gottes kinder vnd er-  
ben sind / wir sein im leben odder tode.  
So spricht Christus selbst Johan. am  
vi. Wer zu mir kömpt / den hungert nim-  
mer / vnd wer auch an mich gleybt / den  
dürstet nimmer.

Einem solchen menschen / schadet  
auch / widder sunde / tod / helle noch  
Teuffel / Er kan auch nicht verdampe  
werden / sondern wird durch den glaus-  
den vnd hertzliche zuuersicht auff Got-  
tes warhafftigs wort vnd abgründ-  
liche gnade / güte vnd barmherzigkeit /  
ewig selig. So sagt Christus selbst Joh.  
am. v. Warlich / warlich sage ich euch /  
wer mein wort höret vnd gleybet dem /  
der mich gesand hat / der hat das ewige  
leben / vñ kömpt nicht inn das gericht /  
sondern ist vom tode zum lebē hindurch  
gedrungen. Ly



Es ein tröstlich ding/das ein Chris-  
ten mensch durch den zeitlichen tod inn  
das ewige leben dringer / Ja ein Chris-  
ten mensch wird den tod nicht empfin-  
den / wie Christus selbst sagt / Joh. viij.  
Warlich warlich ich sage euch / so jes-  
mand mein wort wird halten / das ist /  
daran glauben / daran nicht zweiueln /  
sondern fest glauben / das er durch mich  
vnd vmb meinet willen / einen gnedi-  
gen gütigen vnd barmhertigen Vater  
im himel hat / der wird den tod nicht ses-  
hen ewiglich.

Das ist der freundliche wille Gots  
tes Vaters vnd Gottes Sons / das ein  
solcher mensch / der im glauben vnd  
vertrauen auff Gottes gnade vñ wort  
bleibt / ewig erhalten vnd selig wird /  
vnd ihm eben so wenig / welt / sunde /  
helle / tod vnd Teuffel inermehr schas-  
den mügen / als sie Christo selbst haben  
nicht schaden mügen. So spricht Chris-  
tus selbst / Johan. vi. Alles was mir  
mein Vater gibt / das kômpt zu mir / vnd

Es ij wer



wer zu mir kömpt / den werde ich nicht  
hinaus stossen / denn ich bin vom himel  
komen / nicht das ich meinen willen thu /  
sondern des der mich gesand hat. Das  
ist aber der wille des Vaters der mich  
gesand hat / das ich nichts verliere / von  
allem das er mir gegeben hat / sondern  
das ichs aufferwecke am Jüngsten  
tag. Das ist aber der wille / des der mich  
gesand hat / das / wer den Son sihet vnd  
glaubet an ihn / habe das ewige leben /  
vnd ich werde ihn aufferwecken am  
Jüngsten tag.

Das ist auch eben der befehl Chris-  
ti vnsers lieben Herrn vnd seligmacha-  
ers / hie auff erden gewesen / alle die ewig  
zu erhalten / die an ihn glauben / So sage  
er selbs / Johannis. iij. Also hat Gott die  
welt geliebet / das er seinen einigen son  
gab / auff das alle die an ihn glauben /  
nicht verloren werden / sondern das  
ewige leben haben / Denn Gott hat sei-  
nen son nicht inn die welt gesand / das  
er die welt richte / sondern das die welt  
durch



durch ihn selig werde/ Wer an ihn glaubet/der wird nicht gericht.

Wer nu an Christum glaubet/ das er durch ihn selig ist worden/der hat alles durch den glauben vberkomen / das der ewige Son des ewigen Gottes selbs hat/ kan vnd vermag/wie Paulus sagt. Was wollen wir hiezu sagen? Ist Gott fur vns/wer mag widder vns sein? wilcher auch seines einigen Sons nicht verschonet hat/sondern hat ihn fur vns alle dahin gegeben / wie solt er vns nicht alles mit ihm schencken? Wer wil die auserweleten Gottes beschuldigen? Gott ist hie/der da rechtfertiget/ Wer wil verdammen? Christus ist hie / der gestorben ist / welcher ist zur rechten Gottes/ vnd vertritt vns.

Wie nu Christus den tod /sindel/ Teuffel vnd helle / sieghafftiglich vberwunden hat/also sol vnd wird ein Christen mensch / das alles auch vberwinden/ Vnd wird nu alles eben so wenig schaden / als es dem Herrn Christo ges  
Lij schaden



schadet hat. So spricht Christus selbst  
Johan. xvj. Solchs hab ich mit euch  
gered / das ihr inn mir friede habt. Inn  
der welt habt ihr angst / aber seid ge-  
trost / ich hab die welt vberwunden.

Wer nu inn dem glauben lebet vnd  
stirbt / der vberwindet die sünde / Tod  
vnd Teuffel. So sagt Sanct Johans  
nes inn der Ersten Epistel / am. v. Cap.  
Vnser glaub ist der sieg / der die welt  
vberwunden hat. Vnd den sieg / hat  
vns Christus vnser fromer seligmacher  
erworben / durch seinen tod. So spricht  
Sanct Paulus zu den Corinth. inn der  
ersten Epistel am. xv. Cap. Gott sey  
dancf / der vns den sieg gegeben hat /  
durch vnsern Herrn Ihesum Christum.

Ja es vermag auch widder sünde /  
tod / hell / noch Teuffel / Gott einen sol-  
chen menschen zu entwenden. So sagt  
Christus selbst Johannis am. x. Meine  
schaff hören meine stimme / vnd ich ken-  
ne sie / vnd sie folgen mir / vnd ich gebe  
ihm das ewige leben / vñ sie werden ewig  
lich



lich nicht vmbkomen / vnd niemands  
wird sie aus meiner hand reissen / Der  
Vater der sie mir geben hat / ist grösser  
denn alles / vnd niemand kan sie aus  
meines Vaters hand reissen.

Darumb kan ein mensch nicht bas  
thun / denn seinen geist inn die almecht-  
tige hand Gottes Vaters befehlen / vñ  
sprechen mit Christo / Vater inn deine  
hende befihl ich meinen geist. Denn inn  
der hand Gottes / kan keine seele nimer  
mehr verloren werden. Denn also  
sagt Christus selbst Johannis am. xv.  
Gleich wie mich mein Vater geliebet  
hat / also habe ich euch auch geliebt /  
Vnd wie Christus selbst weiter spricht  
Johan. xvij. Ich habe ihnen gegeben  
die klarheit / die du mir geben hast / das  
sie eins sind / gleich wie wir eins sind /  
Ich inn ihnen / vnd du inn mir / auff das  
sie vollkommen seten / inn eines / vnd die  
welt erkenne / das du mich gesand hast /  
vnd hast sie geliebt / gleich wie du mich  
geliebt hast.

¶ iij Vnd



Vnd ist kurzumb vnmöglich / das  
ein Christen mensch verloren werde / der  
inn einem solchen glauben stehet / So  
saget Sanct Paulus Roma. v. Darumb  
preiset Gott seine liebe gegen vns / das  
Christus fur vns gestorben ist / da wir  
noch sunder waren / So werden wir ia  
viel mehr durch ihn behalten werden fur  
dem zorn / nach dem wir durch sein blut  
gerechtfertigt sind / Denn so wir Gott ver-  
sünet sind / durch den tod seines Sons /  
Viel mehr werden wir selig werde durch  
sein leben / so wir nu versünet sind. Nicht  
alleine aber das / sondern wir rhümen vns  
auch Gottes / das ist / das Gott vnser sey /  
vnd wir sind sein / durch vnsern Herrn  
Ihesum Christ / durch welchen wir die  
versünung empfangen haben.

Wir leben auch odder sterben / so  
sind wir des Herrn / als Sanct Paul zum  
Römern am vierzehenden schreibet / Dar-  
umb kan ein mensch nicht bas thun / denn  
mit Gottes hülff inn Gottes willen /  
gütlich



gütlich vnd williglich sich ergeben/ Der  
zeucht aus dieser falschen vnseligen welt/  
vnd aus den sunden durch den tod/ zu sei-  
nem Herrn vnd seligmacher Ihesu Chris-  
to/ inn das ewige leben/ Daran ihn wid-  
der sünde/ hell / tod noch Teuffel verhin-  
dern mag noch kan inn ewigkeit/ Da ist  
vns das lamb Gottes Christus/ das alle  
sünd der ganzen welt auff sich genomen  
hat/ gut gnug far/ Dem danck vnd lob  
sey inn ewigkeit.

Man bleibe nur inn dem glauben/  
der wird vns ewiglich erhalten/ Denn  
Gott ist die ewige warheit/ der wird vns  
nicht liegen/ fehlen noch triegen. Alle seine  
wege sind trewe vnd güte/ gnad vñ  
barmhertzigkeit. Man spreche

nur mit dem David /  
Inn deine hende be-  
fehle ich mei-  
nen  
geist. Du hast  
mich erlöset/ du trewer Got.

E v Wie



# Wie die Ent- schlaffnen inn Chri- sto zubeweinen sind / Aus 1. Thessalon. 4.

**E**s ist nicht wunder / lieben brü-  
der vnd schwester / inn dem  
Herrn Christo / das wir vns  
vber vnserer verwantē schlaff  
(welchen die welt einen tod nennet)  
bekümmern / betrüben vnd vbel gehas-  
sen / angesehen / das sie vns / nicht allein  
der geistlichen widdergeburt halben /  
nemlich der Tauff / zugehörig sein / son-  
dern auch offemals / vnserer natürliche  
vnd leibliche eltern / vater vnd mutter /  
brüder vnd schwester / vettern vnd  
bassen / schwöher vnd schwiger / son vñ  
töchter etc / odder zum wenigsten mehr  
denn ein frembder mensch / mit freunds-  
schafft oder schwegerschafft / verwand  
vnd zugethan sein. Wo



Wo nu ein recht trew hertz ist/das  
den verstorbenen vorhin am leben ges  
geliebet hat/so kan es sich des traurens  
schwerlich enthalten/ mus ihe zum wes  
nigsten/ein freundlichs mitleidig wort  
lassen/ob jm gleich die augen nicht fließ  
sen/ Denn es fellet ihm mancherley ein/  
darinne er mit dem entschlaffnen liebs  
reiche gemeinschafft gehabt hat/ als/  
das sie vnter einem mütterlichem hers  
gen getragē sind/ haben einen vater ges  
habt/vber einem tisch gessen vñ getrun  
cken/inn einem haus auffgezogen sein/  
einerley gütter besitzen.

Item/ Der sön vnd die tochter ges  
dencken/ wie lieb sie ihre eltern gehabt  
haben/ wie manchen sauren fustrit die  
mutter mit ihn gethan/ wie zertlich sie  
die mutter erneret/ was fur mühe vnd  
erbeit der vater mit ihn gehabt hat/wie  
sawer ihren eltern das ihre worden ist/  
wie feste sie alle wege vber ihn gehalten  
ihr ausgewartet/ ihn alles gereicht/das  
sie nur haben vermöcht zu wegen zu  
bringen



bringen/wie treulich/erbar vnd redlich sie  
von ihnen auffgezogen/was für grossen  
vleis sie aufführen nutz gewandt/ihn als  
lewege was sonderlichs für andern erzei-  
get vnd gegeben/ Ja so es were möglich  
gewest/so hette vater vnd mutter das kind  
ihre eigne seele lassen schawen / vnd das  
hertz im leib mit geteilet.

Widderumb gedenccken die eltern/  
wie ein fromes gehorsams vnd vleissig  
kind sie an ihrem son odder tochter ver-  
loren haben / wie sie das offte geberzet  
vnd geküsst hat/wie schön vnd starck/  
vnd wol bered das gewesen ist/was ehre  
vnd freude sie an dem kind hetten mügen  
erleben.

Ist es aber gemeine freundschaft  
odder schwegerschaft/auch frembde ges-  
ellschaft/so gedenccket einer/ Tu war es  
doch ihe ein getreuer fromer mensch/  
er hat niemands wedder laster noch  
leid gethan / sondern hat sich allezeit/  
gegen dir vnd meniglich rechtschaffen /

trero



traw vnd redlich gehalten / das du ihm  
auch deine seele hettest wol vertrauen  
dörffen/ Ja er ist mit iederman freuntlich  
gewest/hat iederman wollen dienen vnd  
guts thun/ Wer solt sich denn nicht bil-  
lich vmb seinen abschied bekümmern?  
Wer wolt einen solchen menschen nicht  
gern vmb sich wissen vnd haben? Dis  
vnd der gleichen/beweget das fleisch vnd  
die natur/das das geblüt zusammen sin-  
cket/vnd sich des verstorbenen mehr denn  
eines andern gemeinen Christē/annimpt/  
Wiewol auch die Christliche bruders-  
schafft allein hiezū gnugsam bewegen  
vnd erregen möcht/so gar nahe sind wir  
inn Christo einander verwand vnd ana-  
gehörig.

Aber wie mit dem allem / so pfeleget  
ein warer Christ / inn solchem fleischa-  
lichen vnd natürlichen trawern vnd bes-  
kümmern / nicht zuuerharren / sondern  
er bit Gott / das er ihm sein hertz / sinn  
mut vnd willen / dauon wenden wölle/  
Vnd ihm mit seinem heiligen geist/durch  
sein



sein Göttlich wort trösten vnd behertigen / das er aus des entschlaffnen abschiede mehr innerliche freude / denn eusserliche trübsal / gewinne vnd ihnen werde .

Das geschicht aber nu auff dreierley weise. Zum ersten.

So der entschlaffne inuoch vn̄ Gottes fürchtig gewesen ist / so gibt ihm Gott dadurch ein grossen trost ein / das er nicht anders glaubē kan / weil einem Christen seiner person halben / nichts bessers ist / denn auff's schürste gestorben / Gott wolle ihn denn seinem nehisten zu gut / lenger auff erden haben / Gott hab dem selbigen menschen ein grosse gnade beweiset / das er ihn nicht / wie viel andere / lange vnter dieser boshafftigen welt / hat wöllen lassen bleiben / auff das er nicht auch dauon geergert vnd bemahelt würde / sondern ihn in einem rechtschaffnen guten stand / von dannen gesoddert / mit ihm vnd allen auserwelten

Das



Das himelreich zubesitzen / das wölle er  
ihm auch von hertzen gern ginnen.

### Zum andern.

Ist es aber ein böser / er sey iunck od  
der alt / so dancket sein verwanter Gott  
dem Herrn / das er ihn von seinem sund-  
lichen leben / wiewol nicht geistlich vnd  
innerlich / jedoch mit den eusserlichen  
gliedmassen / das die nimmer können sun-  
digen / genomen vnd abgerissen hat /  
Denn ihe lenger ein verstockter / armer  
verblenter mensch / hie auff erden bleibt /  
ihe mehr vnd mehr sundiget er / deste  
böser / erger vnd verstockter er wird /  
vnd samlet also nur mehr Göttlichs  
zorns / dadurch seine straff vnd pein inn  
ihnem leben / grösser vnd hefftiger  
wird / Derhalben ist solchen armen /  
elenden / verstockten menschen nichts  
bessers / denn bald gestorben / Vnd man  
sol sich mehr ihres todes / denn ihres les-  
bens / freuen.

### Zum dritten.

So



So sind offemals die entschlaffen  
frome veraltet leute/ die gar nichts mehr  
vermögen zu arbeiten/ vnd wollens doch  
alles mit emsiger grosser sorge austrich-  
ten/den selben mus vō not wegen/auch  
geitz vnd begir zeitlicher güter/mit ein-  
fallen/Denn das ist ein sonderlicher ge-  
brechen der alten/das sie inner vermeinen/  
ihnen werde zurinnen.

So aber nu Gott der Herr von vns  
allen wil haben/nicht sorg/denn die ste-  
het ihm zu/sondern nur trewe / vleissige  
arbeit/Vnd die alten verlebten kranccken  
vnd schwachen leute / vnserer verwante  
oder Christliche brüder vnd schwestern/  
vermögen der arbeit nimmer / so ist ihn  
warlich das beste/weil ihr sorgen mehr  
gotlos/denn Christlich ist/das sie Gott  
von aller sorge / angst vnd not / mühe  
vnd arbeit/nehme/vnd zu guter ruhe/mit  
andern Christgleubigen selen setze.

Darumb sollen wir auch Gott dem  
barmh



barmherzigen vater von hertzen danck  
en / das er sich der massen vber vnser  
vater / mutter / odder die vns nu von nas  
türlicher leiblicher gepurt / auch von  
geistlicher widdergepurt / angehörig /  
hat erbarmet / vnd aus dieser trübseli  
gen / elenden / schalckhafftigen / bösen  
welt / inn seine trewe / almechtigen hena  
de / zu gnaden genomen hat .

Inn gemeine aber / sollen wir Gott  
dem almechtigē / höchliche danckfagung  
thun / das er die vnsern von dem hefftis  
tigen / grossen vnd teglichen streit der see  
le / widder das fleisch / den Teuffel / vnd  
die welt / Auch von allem vbel vnd vns  
gemache dieses jammertals / erlöset vnd  
erlediget hat / Vnd sonderlich darumb /  
das sie inn einem warhafftigen / starcken  
glauben verschieden . Des sollen wir  
vns trösten / vnd gantzlich hoffen / wir  
werden sie am Jüngsten tag mit gröss  
ern wonne vnd freuden widderumb  
sehen / vnd mit ihnen gemeinschaft ha  
ben /

S

ben /



ben/tausent mal besser edeler reicher/ lü-  
stiger / vnd bestendiger / denn sie hie  
auffer den/ vmb vnd bey vns gewesen/  
vnd gelebt.

Solches sol vns vber ihren ab-  
schied trösten/ frisch vnd frölich mach-  
en/ glauben wir anders / das Christus  
vom tod aufferstandē ist/ vnd wir inn/  
mit/ vnd durch ihn/ endlich auch

alle vom schlaffe auffer-

stehen werden. Darzu

gebe Gott der Va-

ter sein gnade/

güte vnd

barmherzigkeit.

**A M E N.**



# Ein Trostbüch

lin für die krancken/  
durch Johann  
Pomer.

Wie / vnd was man  
denen / so kranck inn tods nöten lie-  
gen / sagen vnd fürlesen sol/  
Auch vom Sacrament des  
waren leibs vnd bluts  
Christi.

**G**ott der Herr  
wil / das wir vns für sunder  
vnd sunderin erkennen / Das  
wir sunder sind / kan er wol  
leiden / das wir vns aber dafür nicht hal-  
ten / kan er nicht leiden.

Wenn wir sülen / das wir sunder  
vnd sunderin sind / das wir nicht gute  
S ij Herzen



hertzen für Gott dem **HERREN** haben (es scheine eusserlich vnser frö-  
keit vnd gut leben / wie from es wölle)  
vnd vns fürchten für Gott / als für einem  
strengen richter / für vnsern sunden / tod /  
Teuffel vnd hell / so sollen wir vns nicht  
vermessen / mit vnsern wercken vnd krefft-  
ten / vns daraus zuhelffen / denn wir sind  
jhe nur sunder vnd sunderin / Es wil sich  
ja nicht reimen / das man ein treck mit  
dem andern abwassche / Drümb mus ich  
verzweimeln mit alle dem / das ich ver-  
mag / Denn ich bin meiner halben mit leib  
vnd seel verdampt.

3 Wenn ich zu der erkentnis kom /  
so hab ich ein geengsts vnd betrübtes  
gewissen / darümb ist mir denn von nö-  
ten / das ich wisse / das Gott der **HERREN**  
gnedig vnd barmhertzig sey / vnd wil  
die sunde vergeben / Aber nicht vmb vn-  
sern willen / denn wir sind nur sunder vnd  
sunderin / verdampt vmb der sunde wil-  
len sondern vmb seines eingebornen sons  
willen Ihesu Christ / der den tod hat er-  
litten vmb vnser sunde willen.

Darümb



4 Darumb ist kein werck so gut / wir  
finden auch kein hülffe inn keiner creatur  
ren / noch im himel / noch auff erden / das  
durch vns geholffen mag werden / sons  
dern allein durch Ihesum Christum / der  
da gestorben ist / das wir errettet solten  
werden / von dem tod / vñ von der hellen /  
Vnd auffstanden / das wir durch ihn sol  
len leben ewiglich. Der Christus ist vn  
ser / so wir an ihn glauben / das er alles das  
gethan hab vmb vnser willen / der hat  
gnug gethan für vnser sünde / der ist wor  
den vnser weisheit / gerechtigkeit / heiligs  
machüg / vñ erlöfung / das wir nicht allein  
frey sein vonden sünden zc. sondern auch  
kinder Gottes des Herrn / vnd erben aller  
güter Christi vnd Gottes / ja Gott ist vn  
ser ewiglich.

5 Diese grosse gnad vnd barmherzig  
keit Gottes durch Christum Ihesum sei  
nen son / wird vns surgehalten vnd klar  
geweiset inn dem hochwürdigen Sacra  
ment des leibs vnd bluts Christi. Wel  
cher die gnade vnd barmherzigkeit nicht  
glauben kan / das die sünde vergeben wer

S iij der



de/on vnser verdienst vnd werck / vmb  
Christus willen / das er sein fleisch vnd  
blut / fur vnser sunde inn den tod gegeben  
hat / der bleibe von diesem Sacrament/  
das wöllē wir ihm radren / nicht aus men  
schen leren / sondern aus den worten vns  
fers Herrn Ihesu Christi.

6 Da Christus das Sacrament im  
Abendessen eieset / sprach er also.

Nemet / esset / das ist mein leib der fur euch ge  
geben wird. Nemet / trincket / das ist mein  
blut / das fur euch vergossen wird zur verge  
bung der sunden / so oft ihrs esset vnd trincket /  
so thut es zu meinem gedechtnis.

In diesen worten Christi siehestu öf  
fentlich / dauon wir zuuor geredt haben /  
das du inn deinen sunden verdampft bist /  
vnd kanst nicht gnug thun / mit allen deis  
nen kressen vnd wercken fur die aller ger  
ingste sunde. Warum solt Christus sein  
leib geben haben inn den tod / vnd sein  
blut vergossen haben am Creutz vmb deis  
ner sunden willen / wenn du selbs / mit deis  
nen wercken / dich vermöchtest von deis  
nen sunden erretten? Wenn nu Christus  
tod



tod durch den glauben nicht dein ist / so  
bleibestu inn deinen sunden / vnd bist verz  
dampft / thu was du kanst odder wöllest /  
es hilfft alles nicht / es gilt auch nicht.

7 Darümb soltu vmb deiner sünde wil  
len nicht verzweueln / denn so du recht  
fassst die wort inn diesem Sacrament / so  
mus dein gewissen also sagē / Ach almech  
tiger Gott lieber vater / wie hab ich mich  
gefurchtet vnd gescheuhet fur dir / als ei  
nem strengen richter / fur meinen sunden /  
tod / Teuffel vnd hell. Nu höre ich das  
mein Herr Christus selbs spricht / ich sol  
nemen vnd essen seinen leib / vnd trincken  
sein blut / er hab sein leib fur mich darges  
ben / vnd sein blut fur mich vergossen / zur  
vergebung meiner sund / dafur dancke ich  
dir Gott / das wil ich inn mein hertz fass  
sen / vnd halten / das das alles fur mich ges  
chehen sey / Ich zweuel nicht / das fur  
mein sünde gnug gethan sey / vnd sie sey  
von mir genomen / nach dem der son Got  
tes fur mein sund / sein leib inn tod geben /  
vnd sein blut am Creutze vergossen hat /  
Ja das ist nicht alleine genug fur mein

§ iij stinckende



stückernde sünd / sondern auch zumiel / wenn  
ichs nur glaubte. Ist nu mein sünde hin  
weggenommen / so bin ich für Gott gerecht  
durch Ihesum Christum / es sey dem Teuf  
fellieb odder leid / Menschen sagen was  
sie wollen / thun was sie wollen / können  
odder mögen was sie wollen / da ist nichts  
angelegen / der glaub inn Christum macht  
mich rechtfertig für Gott / Denn wenn  
Christus werck mein sünde nicht weg  
nimpt / so thuns meine werck nimmer  
mehr / vnd kein creatur widder inn himel  
noch auff erden.

8 Kurtz sag ich aber / sünd mein sünde  
vnd der tod / ein mal durch Christus ge  
rechtigkeit vnd tod hinweg genommen / so  
bin ich frey von sunden / so kan ich auch  
rechtfertig sein für Gott / Bin ich rechts  
fertig für Gott / so bin ich ein kind Gottes /  
Bin ich ein kind Gotes / so bin ich auch ein  
erbe Gottes / vnd ein miterb Christi / Vnd  
das noch wol mehr ist / himel vnd erden  
ist mein / ja Gott selbst ist mein vater  
durch Christi vnsern Herrn / Solch gros  
gnad vnd seligkeit erzeigt vns Christus

im



im Sacrament/wenn er spricht/ Nemet/  
esset/etc.

9 One verstand dieser wort / weistu  
nicht was das Sacrament ist / ja auch  
nicht was Christus vnd die gnad Gots  
tes durch Christum ist / odder warumb  
Christus vom himel sey komen/denn dis  
ist das rechte Euangelion/durch welches  
Gott gepreiset vnd gelobet wird /das ich  
glaub/Christus sey gestorbe fur mein sun-  
de/das ich sol von dem ewigen tod frey  
sein/vnd sey darumb auffstanden / das  
ich mit ihm sol ewig leben.

10 Darumb /sinremal ich weis / das  
mich mein frömitkeit vnd werck nicht se-  
lig machen/sondern die werck vnd frömi-  
keit Christi/so wil ich auch nicht verzweis-  
ueln umb meiner sunde willen/ Denn ich  
weis das Christus sein leib inn den tod ges-  
geben hat/vnd sein blut vergossen zu ver-  
gebung meiner sund / als er selbst sagt inn  
der einsetzung des hochwürdigen Sacra-  
ments.

11 Welcher das nicht glaubt / vnd  
lest sich anders leren / vnd mit menschen

S v treumen



trennen verführen / der helt Christum für  
einen lügener / der da ist der son Gottes vñ  
die ewige warheit / ja Gott selbs / wiewol  
vmb vnsern willen mensch geporn vñ ge  
litten. Inn dem glauben durch Gottes  
gnad wil ich inn dem Sacrament essen  
den waren leib / vñ trincken das ware  
blut meins **HERREN** Ihesu Christi (als  
er mir sagt) das ich also sicher werd / das  
Christus durch seinen tod mein sünde hab  
weg genomen / das ich durch den glauben  
hab das ewige leben. Amen.

12 Die Papisten haben vns geleret /  
wiewiel wir fasten / beten / beichten vñ  
thun sollen / das wir würdig zu dem Sa  
crament gehen / vñ haben vns also ver  
füret / das wir haben menschen gehört / vñ  
die wort Christi lassen faren / damit sind  
wir gefallen darauff / das vnser werck  
soltent wegnemen die sünde / vñ haben  
vergessen / das Christus sein leib vñ blut  
für vns gegeben hat / damit auch Christus  
ganz vnnütz worden ist / wie S. Paulus  
zum Gal. sagt Cap. v.

13 Was sollen wir denn nu thun?  
Antwort



Antwort. Nichts anders denn was wir aus den Worten Christi gesagt haben/ Nämlich / das du glaubest das Christus hab sein Leib für dich im Tod geben / vnd sein Blut vergossen zur Vergebung der Sünden / das sind die Worte Christi / Denn Christus hat nicht anders befolhen / sondern er spricht / So oft ihr esset vnd trincket / so thut es zu meinem Gedechtnis. Was das für ein Gedechtnis sey / ist klar aus den vorigen Worten des **HERRN** / das ist / ihr solt gedennen vnd verkündigen / das ich mein Leib den ihr esset / für euch gegeben hab im Tod / vnd mein Blut das ihr trincket / für euch vergossen hab zu Vergebung ewer Sünde.

14 Das aber das die recht Gedechtnis sey / erklaret Paulus vnd spricht. 1. Cor. 11. So oft ihr esset dis Brod / vñ trincket diesen Kelch / so solt ihr verkündigen den Tod des **HERRN** bis das er kömpt. Darumb wenn du gehest zu diesem Sacrament / vnd issest das Brod Christi / so gedenne vñ bekenne öffentlich / Das ist der Leib meus **HERRN** Ihesu Christi / der für mich



mich gecreuzigt ist / das ist das blut das  
für mich vergossen ist / dafür dancke ich  
Gott meinem himelischen vater / Das wil  
ich in mein hertz fassen vnd nimmer mehr  
vergessen / denn dis zeichen ist mir gegeben  
das ich meins Herrn Christi dabey gedens  
cke. Ein geschencf gibt ein guter freund /  
nicht das man sein nür ein tag lang ges  
denck / vnd ihm guts nach sage / sondern  
so lang das leben weret .

15 Darumb haben die das Sacrament  
nicht recht geachtet für ein gedechtnis  
Christi / die mit ihrer heuchlerey nür dach  
ten auff Christum / wenn sie zu dem Sac  
rament giengen / vnd lebten darnach vn  
christlich / erschienen from für den mens  
schen / vnd gedachten nicht auff Christus  
werck / sondern auff ihre eigene / damit sie  
wolten selig werden . Sie verkündigten  
auch nicht den tod des **HERRN** vnter  
den andern / sondern lieber menschliche les  
re vnd ihre tandwercke / vnd wer es an  
ders machet / der muss ein ketzer sein / weñ  
er auch schön alle gepot Gottes / vnd alle  
Artikel des glaubens preisete / Denn solchs  
Evangelion



Euangelion / als in diesen worten des  
Sacraments begriffen ist / lag vnter der  
banck.

16 Solchen leuten ist das Sacrament  
nicht nütze / sondern verdamlich / denn sie  
gebrauchen des nicht zu essen vnd zu trin-  
cken zu Christi gedechtnis / wie wir gesagt  
haben / sondern machen draus viel ander  
spiegelsechten vnd affenspiel / widder das  
wort Christi / Das sey Gott geklagt / das  
die welt wird gedrungen / die menschen zu  
hören vnd nicht Christum / vn̄ er ist doch /  
dauon vns der Vater aus dem himel  
schreiet / Hinc audite / diesen solt ihr hö-  
ren / vnd dauon vns Moses hat mit Gott  
tes worten weisgesagt / Wer dieses Pro-  
pheten / das ist / Christi wort nicht hören  
wird / die er in Gottes namen reden wird  
von dem wil ichs suchen / das ist / ich Gott  
selbst wil mich gegen dem gottlosen mens-  
chen rechen . Da haben sie schon bereit  
ihr urteil / die widder Christus wort sech-  
ten / odder nicht annemen .

17 Wer ist nu so vnuerstendig der nicht  
mercke / das diese gedechtnis nicht lose  
gedancken



gedancken sind / sondern ein hertzlich zu  
uersicht vnd öffentliche bekenntnis odder  
predige/das es also sey / wie Christus res  
det/das ich errettet/ja das ich selig sey/da  
rumb das er fur mich hat geben sein leib  
vnd sein blut zu vergebung der sunden/  
Jnn der zuuersicht vnd glauben hab ich  
vergebung aller sunden / vnd bin selig / so  
lang die gedechtnis / das ist / bekenntnisse  
Christi bey mir bleibt/ das ist / so lang ich  
glaube vnd nicht verleugne / Wens auch  
geschehe/das ich das Sacrament leiplich  
nicht haben möchte/odder so (als wol ge  
schicht)tod bliebe/ so were ich doch selig/  
durch die gedechtnis / das ist / durch den  
glauben vnd bekenntnisse/das ich von her  
zen glaube vnd bekenne / das Christus  
Gottes son vnd der welt Heiland / seinen  
leib fur mich geben hat jnn tod / vnd sein  
blut vergossen habe/zur vergebung mei  
ner sunde. Darumb wenn du kômpest mit  
solchem glauben / so fürchte dich nicht für  
deinen sunden / denn sie müssen alle dem  
glauben weichen. On den glauben/isstu  
vnd trinckest dis Sacrament zur verdam  
nis. So hab




## Beschlus.

So hab ich nu gesagt/das dis ein recht  
Christlich bekentnis ist / das wir vnser  
haben/vñ alles was wir sind/von natur  
vnd vernunfft vermüggē/verdampft sind/  
niemand kan auch selig werdē aus seinen  
wercken oder vermögen/sondern aus lau  
ter gnad vnd barmherzigkeit Gottes  
durch Ihesum Christum seinē son vnsern  
Herrn/der sein leib für vns geben hat inn  
tod/vñ sein blut vergossen zu vergebung  
vnser sunden. Das ist das recht Euanges  
lion/das vns klar mit ausgetrückten wor  
ten bezeichent wirt/inn dem Sacrament  
des waren leibs vñ bluts Christi / so wirs  
essen vnd trincken zu seinem gedechtnis/  
wie wir gesagt haben.

Nach solchem allem/fragt man den Fran  
cken/ob er solchs/so er izt gehört / also gleub  
Gleubt ers/so mag man ihn absolutren/durch  
trost vnd verheissener seligkeit aus dem heili  
gen Euangelio. Ja solcher glaube (wie gesagt)  
ist die rechte Absolutio / Die sprechen wir aus  
Göttlicher gewalt / vns von Christo gegeben  
Matt. 18. Gehe hin vnd sundige nicht mehr/  
dein glaub hat dir geholffen.





Faint, illegible text, likely bleed-through from the reverse side of the page. The text is mirrored and difficult to decipher due to fading and staining.



